


顏氏家藏尺牘
附考姓

二





顏氏家藏尺牘

附姓氏考

(二)

顏光敏輯

顏氏家藏尺牘卷三

劉良 後收

得覲台光。如挹紫芝坐春臺之上。溫醇和厚。祖風宛在。大拜有日。分榮不小。忻羨忻羨。仙源三十載未到。孔方訓近日如何。同時知交。不及細訊。束裝東渡。溽暑枉顧。無勞軒車。遣童叩止。蠡城秋爽。賜光爲暢。相陪看山。爲大快事也。貴門人數數相見。泛而不切。不過常套所言。乞卽惠瑤函向商。此事如妥。本役自來叩見也。區區圖維。敢不黽勉。念昔在尊先祖教下。患難相依。豈比泛常哉。尊札乞草付來手。斷不敢勞遠顧。居居於往返俗套。切訂上禱。依依不旣。劉良頓首。不另具單。

陳少宰一炳

自年翁之歸也。無日不矚望東山。當風雨晦明。思一時共事之雅。每爲惆悵者久之。昔者叔田有無人之歌。闔閭有匪存之咏。詩人之旨。良不誣也。讀孝靖公表傳。忠概孝行。爛於日星。令人想見復聖之家教。平原之遺烈。但恨不及親炙休光。聆其餘論。猶幸而獲讀表傳。悉其生平。真可謂不世出之人矣。今聖天子正作興忠孝。他日採風者上之。將錫之謚。光史冊以永垂不朽。寧一鄉之私謚而已哉。聞之陽明先生。居喪之日。肉食不戒。曰養其身報朝廷。以顯其親。此乃爲人子之大孝。愚亦敢以此進年翁。天氣暑溽。讀禮之間。望節哀強飯。握晤尙遙。臨穎不勝神逝。

錢中書芳標

青瑣追趨時聆塵誨醇醪饜飫鄙吝都消自台旆南臨忽更裘葛屋梁落月吾勞如何弟以尸喪久媿不獲已乞假南颿適丁東省慈幃之變愁緒如絲亂不可理蹉跎跋涉冬仲始抵里門先在潞河與家兄握別曾有一函托呈清覽因歸心孔迫不及紆道面奉并話闊悰二水三山惟有神馳不置茲崑奴呈上代候崇禛卽日令其北轅家兄處報章並祈卽發來手何如呵凍率勒臨穎不盡瞻邇

數載西清得佩教益迄今寤寐依依弟自里居侍養以來匿影菰蘆不敢以野人姓氏達輦下故人疎懶成癖特知愛之深或勿加譴訶也茲值內叔董蒼水北轅便附荒槭肅候近祉蒼老爲文敏總憲兩先生文孫舉名孝廉敝鄉陳李以後文章領袖指爲首屈弟廿年來雞鳴風雨詩酒倡酬之交一人而已今遊長安諒老年臺神交有素必傾蓋如故商榷風雅披寫胸臆愉快何如詞刻二紙寄呈斧政阮亭先生近已有一行道關不及再瀆同人前均祈一一呼名燈下率勒不盡縷縷

程提學汝璞

別後星馳北發途次山左而病劇矣停舟請告荷允言旋一路間關側聞新猷懋著行旅之人無不嘖嘖頌之病臥中欣羨當何如也弟所乘小舫原屬虛空又因屢歷驚濤復買一葉以備不虞毫無所載祈老年翁俯念歸省心切卽賜放行感佩之私容當崑人叩謝舟次草草可勝神馳

張孔目貞

貞側伏草莽。卽聞老先生。日坐廟堂。進退百官。政術而外。則跼跋藝苑。上下千古。眞爲一世龍門。仰止深懷。豈一日之積哉。但以敵屣蹙蹙。未敢踴進台階。乃承老先生不棄葑菲。納之藥籠。沐殷子之清風。挹山公之雅度。至今夢魂。猶在冰壺玉鑑間也。見委七印。不敢匿醜。敬鑄呈教。幸一笑置之。草堂一區。欲倩法書。尙不見拒。振筆一揮。增榮益觀。當出於尋常萬萬也。不揆鄙陋。妄意仰干。所恃宏慈。統加亮宥耳。匆匆草削。不盡所懷。春明北上。更佈區區。晚弟貞載頓首。勉厚堂求作行楷。十月下浣。當有人去。不識可能卽得否。貞又拜懇。

貞偃蹇支離。人間長物。方爲時所共棄。老先生獨篤念世誼。惓惓有加。若忘其仇。跛瑣尾也者。貞卽頑悍不自知。聞者當何如其榮耶。數月以來。雖未敢以寒暄無益之語。輕瀆清嚴。然而醉恩狗知之一念。亦何能自釋於懷。特顯一介。代候起居。想福履愈增。旂常日懋。爲海內蒼生所共慶。政非僅貞一人之私幸耳。附懇者。敝縣父母。旣以罪行。前月廿五日。必已得人。計其出都。當不在遠。仰冀鼎呂。以賤名相囑。卽體分闊絕。無可通之理。亦望託其鄉人。喻以尊旨。則貞受廈庇。已莫可量數矣。貞塞兌杜門。甘爲螻伏。得其知貞生平。不至過相鄙賤。於願已足。無他說也。夏暑方溽。惟爲道爲天下自愛。不宣。晚弟貞載頓首。

朱制軍宏祚

都門別來。回署卽有繪圖之檄。二十餘日之內。奔走二千餘里。僕馬勞費。大火正流。其苦有非人所堪者。定限迫促。不容少展。以五六十處之州縣城堡。萬餘里之紆折程途。欲其遍歷山川形勢。河道源流。考究

典故繪畫精詳。豈不大難大難。相愛如老年臺先生。其何以教我。得免於無過耶。昨接孫赤老手字。已得列正印。老年臺先生篤念夙誼。古道如此。均感弗盡。尚此附謝。外具不腆。伏惟垂納。

張祭酒永祺

素車東發。忱悃未將。睽隔芝光。倏焉三載。翹企之私。無日不神馳左右。知垂注正復相同也。使來接教。深佩注存。滿擬卽日還朝。統均正位。爲當宁之慶。不第世誼分榮。乃以尊體調攝。北上稍稽。然區區向往之誠。日夕以之。至不佞行能。固不如人。而官資亦在最後。量移未卜。恐有負知己期許耳。爲之奈何。因便附候。闔宅迪吉。不盡願言。

成給諫性

去春闈中同事。亟承教愛。別而南也。不勝尊酒論文之思。弟問水雙江。帆影落落如晨星。雖拮据萬狀。尙不能充額。爲之奈何。老年翁貴關。想大德福命之所歷。必有遠超於荒權者。亦可慰同人之懸切矣。接尊翰。每晤孔令親。訊及知無有不得當者。盛侔旋。值弟抱疥癬之疾。呻吟牀褥間。草草奉復。臨穎曷勝馳慕之至。

袁提學時中

昨日不得入直。承門兄照拂爲感。舍親五十誕辰。欲借光燕許。前日弟曾面懇祈門兄推愛。勿吝珠玉。則弟與有榮施也。顛懇顛懇。舍親吳心樞。紹興人。丁酉武榜。其高堂具慶。有子三。一在庠。爲人甚孝友。有俠

氣亦流俗翹楚也。此聞弟時中頓首。

茅處士磨

前者樞謁不獲親領教言。枉顧又失倒屣。自愧無緣。殊深罪歎。乃蒙華翰下頒。又值抱疴於友人齋頭。不及裁答。初二日。竭誠奉候。此復上顏老先生大人台侍。晚生茅磨頓首。

沈明經季友

屢蒙高誼。極應奉命。但鬱鬱羈蹤。留此無益。一動歸思。便如走丸矣。十五日。斷擬早發。尙容作歌留謝。雅情未盡。修翁老先生大人吾師。小姪沈季友頓首。

汪處士耀麟

去尊寓遠甚。不得時相過從。殊懷戀戀。俗冗尙未攀教。容集諸同人。作竟日談。承賜太翁老先生表傳。讀之令人敬佩。高風豈近今可得耶。先君行述墓志。附呈台覽。適送拙刻時。未敢附上。恐以爲不祥耳。豹老紙債。卽致之。修翁先生大人。晚弟耀頓首。

雨中未得走候。疎略之罪。知不可贖。十九日。奉攀大教。蚤至是禱。送徐健翁詩。曾脫稿否。同人俱齊。揣候佳篇。壓卷來冊一葉。乞書其半。彙成卽寄京師。至望至禱。修翁先生大人。晚弟耀麟頓首。

顧處士宸

頃見老年翁七言絕句。真絕調也。已借重六首。入拙選矣。更有佳詠。幸多多惠教。縉紳借一看。年家教弟

宸頓首。

嘉肴旨酒。深費主人之心。偶以小疾。未能久坐。竊自憎其薄福耳。此刻適櫟翁訂晤。尙欲一進城。不敢再謁謝。昨絕句一册。併大作一紙。幸卽發付。有貴省名詩。惠數册。更感。侍教弟宸頓首。令叔金陵諸詠。可錄者多。尙未細細選定。弟此選最嚴。毫不徇情面。故錄出者。絕不示人。今遇知音。敢以絕句一種呈正。尊作亦在內。看過卽付還可也。令叔可一晤否。弟宸頓首。

曹中丞申吉

寄舍親一函。幸攜至江寧。覓便與之。渠僅一細民。不足煩照拂。今奉銀五十兩。中分十兩寄姚親。其餘四十。作置衣幣之用。如有不足。暫借用可耳。幸驗存之。遠行不得祖帳。一握手。惟長途自愛。江寧藏書家。如有曹能始十二代詩選。幸覓一部見寄。餘不一。申吉拜懇。

董處士樵

蒙賜鴻篇。兒婦借垂不朽。感勒無極。先此鳴謝。容晤叩不盡。修翁先生知我。小弟樵頓首。

高檢討詠

臥病經旬。初十日始得小愈。老師台委。緣貴長班。送至趙老先生長班宅內。沉閣許久。前晚始送到。卽已力疾爲之。但未及脫稿。不敢呈覽。至於筆墨疎謬。姿質駑劣。殊媿不堪鞭策。統冀慈原可也。門生高詠頓首啓。

歲月遷延。久疎函丈。緣貧病交侵。日坐愁城苦海。故也。三詩脫稿。恭呈台覽。應酬填委。殊媿不工。乞老夫子加之魯墨。運以郢斤可耳。王阮亭公祖前面徐老師。甚相督過。云有見顧不答之罪。蓋王公祖榮補時。詠曾以紅全謁賀。三日後方蒙寵答。此後別無見顧之事矣。賤貧之子。願交鉅公。足跡屢及門。而關人辭焉。則有之矣。豈有長者車騎光臨。乃反悍然自外者。此可以理度者也。或比時未面。司關忘登掌記耳。晤間乞爲叱致。感甚幸甚。門生高詠啓。

汪編修琬

今又製乳金印色少許。可賜一盒分用。妙極。可以甲天下。印油乃十竹齋者。不盡佳。容自製好油奉鑒。金扇二柄借用。嗣容償弟可也。弟琬頓首。

別後卽將註過諸章。送山子趙親翁。云得面商字之陰陽款致方妙。弟卽令親叩晤教。希善待之。此公忠厚人也。勿吝見是禱。弟琬頓首。

路博士鶴徵

日來屢叩寓齋。值老先生探梅山中。未得把晤談心。悵悵殊甚。拙刻已遵台旨。借重尊評。特印就呈覽。妻弟超念章。夙仰老先生風雅主盟。渴欲奉教左右。奈彼此往還。不獲謀面。殊深緣慳。茲又迫於掃墓。偕晚鄉行。渠所送文集。思得登晏大紱。以光梨棗。特囑晚轉懇。不識可慨然允否。扇三柄。并求椽筆一揮。統俟返舍時。走謁面悉不盡。晚生鶴徵頓首。

昨偶過湖上。知老先生自昭慶移寓。渴欲趨謁。朝來竟爲雨阻。悵快殊極。來扇求椽筆寫小行書。容少霽面謝。不旣。修翁老先生大人。晚生鶴徵頓首。

王處士暉

渴欲一登龍門。而領教益。不謂久病未痊。遂遲晉謁。辱承不吝彩毫。兼賜尊刻。何啻百朋之錫耶。尊照領到。容俟精神稍旺。當草數語請政也。率復不一。晚生暉再頓首。

李巡按植

別來猶得借庇。以叨主人之惠。但日望返駕。終以不得常侍左右爲歉也。屈翁老原約一二日間。同赴雲間一晤。不謂商議間。忽覩來諭。開視捧讀。如親聲歛。但制晚何能。而克當此懇懇垂念耶。州中事已經子老書內說明。亦無容再陳。至劄付一事。曾屢託羅致。全無行之者。奈何奈何。春色撩人。愈增客況。伏惟珍重。是所願也。上復並候。老爺萬安。制晚生李植叩具。

周經歷在浚

昨家兄手摺。承留意。至感至感。明日大收。家兄亦逐隊而往。總乞必當。知先生定不膜視也。再瀆不一。修翁先生。晚在浚頓首。

昨暑中褻尊。罪罪。稍涼當圖再聚也。大刻拜領。謝謝。神識碑小說書目。適正馳上。使來藉奉。諸容晤悉。晚浚頓首。

聞台駕有眞州及勾曲之行。故未敢走候。此時想已歸矣。天氣漸爽。稍遲尙期作郊外之遊也。惡姻緣小說。前呈五冊。想已閱畢。幸付來价。因吳門近已梓完。來借一對。欲寄往耳。諸容面教不一。修翁老先生。晚在浚頓首。

陽和初屆。瑞雪芳霏。想老先生擁爐吟咏。坐中佳士。共爲欣賞也。若蕭條野人。徒多戰慄耳。承委拙筆。呵凍爲之。未能如願。仰求諒恕。容圖躬叩不悉。上修翁老先生閣席。晚阮頓首。二紙小印。并完上。昨奉叩承老先生教誨飲食。謝謝二章完上。媿以雕蟲刻鵠之技。仰承龍翔鳳翥之文。敬附圖書。藉光不朽。知茯苓芝之遇合。洵可千古也。不揣疎拙。於尊銜內妄增一字。以配其文。不識有當台意否。泥濘不獲。躬致請益。草此代面不宣。上修翁老先生閣下。晚生阮頓首。

李方伯之粹

巴里之音。塗鴉之筆。皆足爲大方絕倒。但以願教之殷。不暇自匿其醜。惟老年臺不吝郢政。足紉雲誼。容晤未既。弟粹頓首。

龍司馬光

辱年翁骨肉之誼。故亦不敢自外。但謝去筆墨已久。所見未必是。幸諒之。弟在此尙有十數日。便道幸常見訪也。兩詩統璧上。修來年社盟翁。侍史弟光頓首。

鄭處士淮

昨藉吳老先生獲登龍門。深慰鄙懷。更蒙垂青不棄。隆誼殷殷。真沐我於春風中也。謝何可言。拙染一冊。恭呈大教。幸莞存之案頭。必賴青雲游揚。私喜葑菲之幸。但媿末技。不堪爲說項之資耳。不盡欲言。顏老先生大詞伯。晚生鄭淮頓首。

宋學博實頌

聞先生歸寓。未及過候。爲耿歲除。無以娛客。小物二種。聊供清翫。幸莞存之。春聯祈右軍一揮。感荷感荷。餘面識。小弟穎頓首。修翁老先生。

汪處士徵遠

歸讀老先生翰教。卽與周梓人說明。山志暫停數日。先囑從事大集。今日因送吳山大師龜子過真州。不獲面復。歸時容趨教不盡。修翁老先生。制晚徵遠稽首。

曹處士重

春雨不絕。阻我良晤。念可知也。昨聞老先生庚韻詩已成。祈卽惠教付刻。夜來觀堂分咏。錄供噴飯。幸斧削荷荷。尊筮畫完附繳。敝扇定已揮就。并望發歸。餘俟趨對以悉。修翁老先生年臺大人。晚生重頓首。

孫燕 俟考

適得拜觀儀型。後學獲有矜式。大快生平。奉懇藩臺一札。求先生鼎力。卽爲轉致。倘獲寸進。皆屬栽培之力。不獨燕與諸生。永矢弗諼。卽家君亦爲心勒。更乞索一的示。愈沾作養宏恩矣。恃愛悚仄。伏冀原宥。修

翁老先生大人晚生孫燕頓首。

耿編修願魯

連羈俗穴致疎走晤。深用悵然。茲啓者。江南新援例監生沈光峻。目今文在貴衙門。未得到監。敢求老年翁留神。俾旦晚送監。佩德不僅弟已也。諸容晤悉不一。弟願魯頓首。

沈泌 俟考

屢混興居。殊增悚仄。岱宗之不遺培塿。於此見一斑矣。恭聞田大文宗。於今日起馬回本衙門。所懇二呈詞。能卽趁今日。鼎致批發。尤爲直截了當。而舍妹夫梅生之激感高誼。寧待言耶。率稟不莊。皇恐皇恐。年家晚生沈泌頓首。

黃進士之鼎

拙卷呈政。所言傭書者。乞代爲一問。容謝不盡。啓修翁老年臺卽太史。弟之鼎頓首。

柳孝廉齋

雅集定期。候年兄酌示。以便遵行。是日邀大年兄。弟當具柬。再同年兄共帖。并請王鶴汀年翁一敘也。主客單附覽。分金五兩奉到。嗣容補送不盡。弟齋頓首。

魏太守麟徵

昨承鼎呂允賜解推。翹切無似。今爲時已迫。諸凡未能就緒。敢求老年兄爲弟多方設處。以濟然眉。弟至

竟時必持送潭府也。端此瑣瀆不一。弟麟徵頓首。

惠明府周惕

比日多病畏熱。有失侍教。馳企不可言。新製已付刻未。急欲諷詠。不能待刻工之竣。得以付寫。後藁見賜。所至禱也。連日擬錄客中文字。先呈一二義。幸即改抹付下。詩說上卷。亦求擲還。下卷錄未竟也。晚惕再頓首。

刻樣極佳。連圈似不可少。但不須滿幅。前輩選本。但連圈佳處。餘俱不用圈點。評語載後。應署姓名。且去其無意義者。若大人先生。不便書名。可以不錄其評。蓋論次文章。原屬後學之事。如李漢之序昌黎。子瞻之敘歐陽是也。今雖制義。亦宜略做其體。附此奉商。不審先生以爲何如。惕再拜。刻價幾許。一百。便乞示知。

刻工令其詣府自言。可用與否。亦唯尊裁示之。詩說及制義。幸即付來。舊刻一紙。并附請正。令弟先生近藝。肯一賜讀否。念始廷試卷已不刻。二有札曾及此段也。刻下將養疴蕭寺。恐疎問難。達且晚容趨侍。且聞一言自廣。不宣。晚惕頓首。

前日承翰教。即便奉詣。直尊從出門。不敢請見。若今日得暇。當即相造。且端策一問。詹尹。否則異日趨教可也。特此。晚惕頓首。

每思趨侍。輒復嬾廢。仰止之懷。無時不依依也。婁讀新製。賞心不已。私心追慕。此種文筆。恨學力不迨。而

有司尺度。又復束其心手。局趣若驂之隨。斬可發一歎也。偶錄三義。就正有道。幸輟忙塗。抹卽付禱。禱屬一枋。求書近作。餘語另布。晚惕頓首頓首。

翰來正直出門。故信歸不及取。富尊意卽語廣平公。渠再四辭讓。卽託致謝。且請徧告貴衙門諸先生。奇韻暫附上。另日尙欲借鈔也。晚惕頓首。

日來甚無事。出外奔走。拉友朋清談而已。頃叩謁。直駕將出。不便請見。特屬鈴下致語。漪亭先生。定已得選。恐彼尙未知。曾有書達之否。聞兩日正在通州。然否示之。晚惕頓首。

祖氏園乃在東柵南湖。此刻卽行。不及奉別。耑望後日嗣音。筆賈陸孔庭兄。爲人誠實可交。其筆在吳中諸工之上。進而試之何如。以後若有書問。孔庭可託也。特此。晚惕頓首。

日來小宄。性不能堪。致脾氣作惡。明早卽同從游者。養疴祖氏園。旬五之期。乃得還也。近作一首附正。幸輟忙塗。抹立付。或晚間奉別時。走領。尊刻若印過。亟求賜讀。主臣主臣。晚惕頓首。

兩閱月不獲趨侍。企懷何可言。尊刻計已告竣。幸一一賜教。八月初入城。當覓快對也。敝門生宋基業。廣平相公猶子。前曾在貴衙門。考過州佐。刻下復就科試。令彼造謁門下。教之不一。晚惕頓首。

墊人性懶。病與之會。遂爾廢棄人事。雖仰止如老先生。亦不能時時趨候。他可知矣。讀來教。深感雅誼。旋聞之孟夫子。明日旁午。當來叩謝。且欲望見顏色。幸假片時之暇。略一接席。晤對頃當知其人之長厚也。新製送還。詩說及雜文。望卽賜下。時文若未批抹。明日來領。刻工卽日令其呈樣也。令弟先生。久未得晤。

極念極念。希致語。晚惕頓首。

久未入城。聞尊體不快。極懸懸。嗣奉手示。始知病瘧。此亦未足爲困。經云。夏傷於暑。秋成痎瘧。略服消暑湯劑。調節飲食。指日可愈也。南人慣有此症。絕不經懷。北方頗不爾。大都一寒一熱。不能少忍。反增病於快意中耳。然否然否。萬望寶嗇自愛。尊刻求卽賜讀。近來亦有經義幾首。然無足觀。外間議論。痛惡典雅。奈何奈何。附此發一笑。令弟先生。統此致候。晚惕頓首。

尊酒論文。平生快事。但過費梓泲。差爲不安。敬謝敬謝。大著領到。容屏除塵俗。悉心細讀也。賤子持論。常謂古文時文。不從六經而出。總無是處。漢唐人作注疏。卽一字一句。必考證出處。貫穿諸經。柳子厚所謂。洩釋融洽。與道大適者。今人未曾夢見。安得懸尊文於國門。使俚俚無見者。皆見青天白日之清明耶。欣賞之極。發爲狂言。知執事不以爲罪耳。鄙著尙有可請教者。惟時文最少。然旣命之。敢不錄正。旦晚趨侍。以悉。不宣。晚惕頓首。

制義若得盡讀。豈非快事。入京來。未有所獲。但得侍教先生。爲平生一樂。以賤子鄙見。時文終非傳世之業。以此種心思手筆。爲六經作箋解。不更快乎。歸熙甫先生。言語妙天下。輒自鄙其時文不足爲。此非無見也。愚人狂論。未知有當高明萬一否。詩說乃是常語。何以得蒙欣賞。慙媿慙媿。刻下幸暫付還。另日再錄詩攷。及他經解。一并呈正也。舉世碌碌。知音者希。非執事無以發其狂言。勿罪勿罪。主臣主臣。晚惕頓首。

夜來見我兄形容少減。心竊憂之。西風獵獵。正宜鍵關靜攝。以俟復元。況病加小愈。尤當慎重乎。弟凌晨早發。更無遲回。但離愁萬狀。欲去不忍。晚刻當偷閑再叩。以悉別悰也。名鱸甚精。何當割愛。台命諄切。誼不敢辭。第家藏一二。儘堪撫玩。仍留長兄案頭。如弟日侍左右可耳。若以他物見貽。弟自不敢璧也。可發大噓。篋籥乃衛生之寶。再拜珍藏。此中所以尙容面求提命。束裝匆匆。先此暨復鳴謝。不既。小弟元龍頓首。

知己分攜。倏焉三月。懷想之私。形諸夢寐。恍然若日侍左右。離愁千萬。實非毫楮所能罄述也。潤州返棹。以老親多病。晨夕焦勞。每從吳門訪醫。輒探老年長兄返旆之信。寂無確音。懸念不可言。適遽使至。審悉台社平安。踴躍無量。拜讀瑤翰。懃懃懇懇。愛我憐我之誼。溢於紙背。中心藏之。何日忘之。銀籥檢入。尙奉爲枕中鴻秘。不敢輕以示人。倘前津得渡。決不忘老師傳心之力。口籥似有微驗。第因作輟任意。未能呼吸入神。手教勉以力行。從此益加奮勵。念茲在茲。不敢辜大恩也。感謝感謝。墨妙甚精。懸之座右。如對芝宇。永永勿諉矣。硯兄前四月間。有信來囑詢起居。望駕北行甚切。俟月杪便鴻至彼。當再囑。潭府種種。不止台諭所云失案一事也。年兄安心消暑。不必內顧縈懷。時當炎溽。百凡爲我道珍重。金壇新樣雲葛二端。宮扇一握。聊誌區區。餘候文軺過吳閫時。買舟細倒闌縷。不一。小弟龍再頓首謝。

兩日正擬出門。以文旆山遊未返。用是欲行且止。登臨所至。定多佳咏。少頃當趨讀。并悉縷縷也。二册裝潢告成。耑伴奉覽。其工值弟已給之。不必重營清慮。二套明後亦可得。先此代叩不盡。史處竟爾寂然。必

祈竣局乃妙并懇。

極欲叩晤。以事機尙未有成緒。用是逡巡。然行止亦只在旦晚也。前小价事。當事未見施行。豈爲奸猾攔耶。乞年兄速命尊管。再往力催。否則小人道長。我輩氣沮矣。奈何奈何。初十日候駕。蚤光并禱不盡。瑣事重荷。鼎呂得以雪忿。感且不朽。聞羣小正在禱求。用是避嫌。未敢趨叩。駕行尙宜少紆其期。祝祝。台册題就呈政。操斧般門。殊不自知其醜矣。冗次草草不盡。

年兄有意西來否。弟在寓鵠候。幸惠然是禱。前懇亦出不得已。望年兄留神再囑。必於薄面有光乃妙。朱雪田風流名士也。皈依甚切。聞駕今年有當事之席。或以此情節致之。不審可否。惟台裁之。其來札附呈清覽。不一。

同作天涯之客。承年兄臺種種渥愛。入人肺腑。感激殊恩。夢寐以之。弟自二十日叩別後。扶病過行。至二十六晚刻。始抵里門。一路跋涉。而腰間所患。陡然奇瘡。其痛楚不可當。至吳門卽覓醫診視。云此係濕痰流注。非藥石可能奏功。必用針治。乃望瓦全。目下計無所出。遣人赴浙中延醫。吉凶利鈍。俱未可卜。或叨長兄福庇。不致長謝人間。得他年再瞻色笑。深有願耳。所事其父母兄弟。俱心悅誠服。奈閨秀八月中染患脾症。久痢之後。元氣未復。至今猶支離芙蓉繡褥間。一時萬萬不能迫其遠道。弟恐此中或有他飾。特令小婢親往驗看。一一不爽。何佳人福薄。而才子緣慳。一至此耶。序逼歲寒。恐征軺不能久待。或俟春和氣暖。台旌到都之後。卽命使乎來迎。或以山川阻修。往返費重爲嫌。另尋別章。行止俱候妙裁。非弟所敢

出也。萊兄至今未到。不知留滯何處。前件大費苦心。竟爲愚弄。觀其動靜。仍眈眈於舊習。奈何奈何。容俟萊兄來時。再與熟商。或令有所歸着。則可否則棄之不甘也。非物肆種。奉佐長兄清玩。亦千里鵝毛之意。祈叱存之。舟車漸寒。途中萬惟珍重保養。倘遇南鴻之便。不時惠我德音。至禱至禱。病中倉卒。作書不盡。萬一仰祈崇鑒。臨風馳戀之至。年小弟名心肅。

晨起正擬趨叩。奈酬應無少歇。而腰間發腫作熱。深悔不聽長兄之言。以受此奇苦。明日遂杜門謝客。延此殘喘。接教知有同心。我兩人當力圖靜攝。以俟復元可也。長兄精神雖旺。然外實內虛。亦爲可患。節勞保重。至祝至祝。旅邸同病之憐。感銘肺腑。敬謝不盡。小弟元龍頓首。頃江甯郡守賜顧。譚及曹澹翁先生。爲逆所害。一門盡節。其言甚確。末路誠可蓋愆也。并聞。

夜來酣擾。幾忘旅況。非年長兄愛弟之深不至此。感切感切。晨起瘡勢略緩。尙未能酬應。故不敢出門。想荷慈鑒。午刻覓得一花。望年兄拉萊翁早過快敘。作竟日之歡。幸勿他拒。至禱至禱。萊翁處乞卽訂之。切切。在公家兄弟。已走札約之矣。并聞。小弟元龍頓首。頓首。

頃承教。因對客失復爲罪。賤疴疼楚如故。不發不消。醫生束手。今惟靜以聽之。更無他法。台體服藥後。可得平復否。舌爲心之苗。心火盛則見諸腫熱。黃連乃勝藥也。不審方中及之否。旅病交營。歸心如箭。明後當叩悉縷縷。大駕萬勿出門。祝祝。小弟龍頓首。

痛楚場中。想及長兄。咫尺消息時通。煩悶亦去八九矣。方生平平。頃江甯郡伯送一醫來。頗有道理。看晚

間動靜。再當馳報左右。以慰諄注。尊恙似外感居多。萬祈靜攝。以節勞清心。爲第一勝劑。弟歸思甚切。接教又不敢遽返。容面商之。小弟龍伏枕頓首。

台恙聞已平復。尙祈益加珍攝。慎用飲食爲上。勿過啖也。昨內科劉兄。診視弟脈。氣血兩虛。氣盛則血行。服藥後。病勢已去其半矣。倘今日過尊亭。幸再致其來。晚刻賤體略可展舒。當趨叩九頓也。附謝不盡。小弟龍頓首。

敝相知鄭桐原兄。高士也。長於宋元名繪。昔在王孝翁幕中。弟深服其學行。望年兄進而試之。前臨別時。曾爲特薦。卽此兄也。留神汲引。切切。小弟龍頓首。

頃劉兄來。知尊體已全愈。不勝慰悅。刻下宜大補元氣。不宜再用尅伐之劑。揀參少許。前敝房師從都門郵寄者。其味精厚。乃真土木也。敬以奉用。幸照入。賤恙將痊。明後或可出門。卽圖趨叩不盡。

早承手示。以高臥失復。罪罪。賤恙瘡勢少退。尙未能頓消。因日來服破血藥太甚。元氣尅削。脾經遂致困倦。卽欲不伏枕。不能也。台體初安。萬祈保重。昔人云。養身莫若寡慾。誠爲良藥。諒長兄必不以鄙言狂瞽也。祝祝。德州到省不遠。再圖快敘。正未可卜耳。小弟龍頓首。山陰雖執法。然未能大快人心。昨已發府再勸矣。容晤悉之。并聞。

李太守鴻霽

江湖散人。忽來京洛。正借因依良友。消遣歲年。乃老年兄及子綸兄。相繼言歸。望望停雲。不啻失左右手。

每欲寄候。苦無便羽。讀來翰。慰契闊矣。弟以不才潦倒。兩年來居然教讀老生。此中況味。局外人未許問津。源源新例。雜沓而來。財無卜式。遇則馮唐。積薪之歎。將不知何所究竟。袁杜少贈句有云。白首爲郎猶絳帳。那得不令人感慨。去年秋。例得分校。自謂清正之操。可沽名於士夫。而孰意反因以得罪。雖我輩中人。無一不諒其無他。而讒忌之口。亦難盡泯。旣不圖利。又不得名。甚非自命之初心矣。此中委曲。子綸兄能悉知之。因年兄骨肉之交。故并及之。大年翁不專函。孔年兄許。并祈致聲。臨池依依不盡。

別離愈久。懷想愈切。自入春來。屈指老年兄抵都有日。謂可朝夕談心。接來翰。始知行旌暫稽。溯洄殊深。各曹壅滯多端。獨貴衙門升轉甚速。年兄宜乘朝氣。扶搖直上。勿徒久戀東山也。吾鄉大槩無雨。敝縣尤甚。深慮人情不靜。不但一家衣食之計。頃聞貴郡秋禾頗盛。乃亦枯旱至此耶。丁巳之役。可謂公憤無他。而讒者之口。猶有煩言。浙中真屬弊藪。幸借同事諸君子。廓清殆盡。而好事者。又皆歸功於區區。前所謂求全之毀。後所謂不虞之譽也。獨是散曹末品。當此人情世事上下交困之時。於花花世界中。猶然冷落以歸。此固人所不信。卽弟亦初不自信耳。便道里門。侍家君膝下者月餘。又健壯善飯。尙能步行二十里。差慰於懷。弟連年爲典籍所累。形神疲憊。竟與詩書無緣。偶爾涉獵。都不濟事。近中博學鴻詞。兼之年家子弟。選館多人。極盡一時之盛。對此同學。依然故我。不能不有馮唐之慨。五月間。第五小孫生。則弟落莫場中佳事耳。題名并全卷呈覽。餘容令兄先生到時。再寄不宣。

服官以來。稔知至性篤情。脈脈彼此相關者。年兄而外。指不數屈。故自建節以往。不禁離羣之感。久欲一

函通候。而不得便。惟有時向恠兄問訊。前知有西清故人之句。乘車戴笠之誼。何以異是。新任江寧令海嶠年兄。束裝匆遽。未及一字。帶致台端。江寧張守亦未修候。海兄爲念年知交。幸推分及之。翰到不啻面談。喜極欲狂。詢知近履佳勝。慰懸切矣。關署雖清。而詩酒江山。佳興勝緣。收攬殆盡。大是人生樂境。閉戶可以讀書。開門可以積德。持身報國。俯仰所樂。我輩胸懷。當不徒溫飽着腳。何如何如。弟於明年之冬。後年之春夏。計當升而且內。但念父母年高。急欲圖歸侍養。已告暫假二十餘日。所以未卽遞呈者。因此時衙門仍復舊制。當年曾有三年咨部候陞之例。如果得妥。則明年正月初七。弟卽滿期。大約衙門內無一善況。恐此事亦成畫餅。但既有此機。不得不稍候數日。以定行止耳。任仲玉年兄。現住尊宅。行卽詢之。單年兄行時。曾以年兄椅數把。條桌一張。寄弟處。弟如家行。當轉寄伊翁老許。獨美人屏。弟欲攜之而去。聊作金屋真嬌。年兄遊名勝地。眼界大闊之後。視此畫或土苴矣。一笑。澹兄處。行致台意。中情縷縷。不能盡及。且有不便形之紙筆者。統惟照鑒。神往不宣。弟霏頓寄。

北埜子綸兩門兄下棋。得錢數百。作東道。吃了登高。今子綸已傳進署。而玉乘子山左珣又復爽約不至。弟與北兄兩人。如何吃得許多。且登高未免太寥寥。幸速過爲妙。弟霏頓首。

敬啓者。王冰壺夫子。連生兩孫。又值其次公子進學。弟以及門。被同人以詩裱屏爲賀。如此大題目。又衆耳衆目所在。自非名手如吾兄。不可爲光。明知年兄不輕操刀。而又正當公務繁多之際。弟深體此情。故自入都以來。從不敢以此等相干事。迫於不得不然。千祈年兄走筆一揮。且初十上屏。望於明日賜下。斷

勿見拒爲感。如不見允。弟當親至奉懇矣。不盡。弟霑頓首。

榮行的於何日耶。舊年以五言杜詩一套求選。不識已看完否。暫祈檢付。弟霑頓首。

日作教讀事。不得與知己故舊朝夕縱談。苦情多端。憑誰訴語。初四阮亭處陪弔。是日同事否。弟九年單恩一軸。已到部矣。當時弟卽假歸。未領執照。無憑往領封軸。昨承慨允代領。幸留神容謝不一。修翁老年兄弟。弟霑頓首。

周處士碩

去人持手示。旋開讀如晤。極知大費曲折。更見老先生不以疎遠而忘故人也。感甚感甚。承諭都中一遊。足徵始終摯愛。第以家累縈懷。且值此粟如珠之歲。目下雖欲往而未能。以待來年。躬叩大教何如。尙冀留盈尺地。容野鶴側立於階前爲幸。或者捉筆賣手。借大人之德。可附不朽。定可知也。臨池北望依依。晚碩頓首。

鍾參議朗

客歲小僕南旋。荷老年臺深情。過愛種種。使人刻骨。敝役到都時。適值差回到部。凡所傳命。俱已銘之。心版。夫何新正留神訪問。絕無至者。心壹怪之。及至巡試商洛。時晤令親孔涵老。備道顛末。竟因機緣相左。垂橐而返。弟聞之汗淋浹背。不知所託何人。乃荒唐至此。使我何以自贖也。孔涵老竭盡心力。止得二百章報命。其家報中。想能詳悉耳。弟試事粗完。循例解卷。崑令敝役叩謝。并致歉仄。老年臺文章道義。久爲

吾道宗盟。今幸主持。或可邀庇。百凡上下左右。還祈加意照拂。非筆舌所能盡者。小僕晉叩。外致淺芹。非敢謂已盡區區。更望茹鑒。秋冬間圖報不既。晚朗頓首。

承委駢語。適賤冗蝟集。未得搦管。值路湘舞舍親到都。因爲乞憐。振筆立就。泉湧露垂。頗稱工敏。湘舞聲華才望。敝鄉推爲祭酒。不第十倍。晚朗已也。不以實告。則是藏人之善。而且以欺吾知己矣。敢以原稿呈覽。湘老係葉芥舟受業。素慕老先生風雅。想芥老必爲先容。則是稿亦屬士見大夫之贊矣。徵詩引亦卽草呈。諸容晤悉不一。前所商已繕一稿。俟查確面悉請正也。

獻春叩賀後。曾再過問奇。俱值公出。不得一奉清揚。悵惋無似。辱委壽言。逡巡再四。先生騷壇哲匠。何忽問道於盲。不敢方命。強爲屬草。然一見大巫。神氣盡奪。鮑家累句。觸緒紛來。先生見之。必當掩口盧胡也。媿絕媿絕。暇卽走訪。面旣不一。德翁先生年臺。晚弟朗頓首。

秋來因賤體委頓。息影內城僧舍。承老先生賜顧。有失樞迎。且未得報謝。殊抱歉仄。太老先生雙壽。勉成俚句。自媿拙劣。尙容躬祝。以展鄙忱。敝省試事。正未有期。前說當姑止之。便中并及。不盡。晚朗頓首。

接教極荷留神。謝謝朗少困賤吏。因工握算。況清江權稅。爲數五萬有奇。項款無多。易於料理。心計之餘。正堪追陪嘯咏。幸先生鼎力吹噓。感戢無既。草復德翁老先生。晚弟朗頓首。

連日賤冗。不獲趨領大教。殊深歉仄。近工部咨過貴衙門。監生慕國璿。係敝鄉藩臺慕公乃郎。托沈繹堂老師。爲之照管。日來未見轉咨送監。屬晚轉懇老先生。得卽咨送。深感照拂。未審日內能卽移文否。晚本

圖面叩緣內城有事不能如願。特此布瀆。希台原之宥。次草率不盡。晚朗頓首。

蔡太守兆豐

別後走澄江。與廣明竭力。方得達尊札於當事。不意竟成畫餅。卽不佞亦有所求。仍未見允。束手而還。垂頭喪氣。作客之難如此。目下解維北去。囊中止餘十金。故分家累之半回南。望門下少資助一臂。不過數金已足。再乞示知何如。不佞擬孟夏中旬至白下。邀門下一面。并有所求。方能返都。但不知簡年兄曾考否。有王誠者。二峯周夫子薦於不佞。在關一年。亦無甚提挈。茲以不佞差滿。特轉送門下。端懇酌用。容面晤另布。何如是瀆。

介子抵淮。知門下已從中路到任矣。此中況味。不佞領略已盡。但門下才福過人。自與不佞蹇劣者。不可同日語矣。會試得人。不佞竟不知姓名爲誰。幸一一遣一的役。送過蕪關。俾其無阻。則仰紉高誼。豈啻百朋哉。小詩已刻就。謹呈覽。至毘陵時。廣明已代不佞災木。故阮亭之敍。門下之跋。俱未壽梓。入都時。卽應借光也。餘不一。

白下返棹。復寥落於吳門。謙老之札。又辜高誼。所以項客之金。竟負門下而北。至今中心。猶兢兢不安也。入都應酬一切不能少。而索逋者盈門。銅觔參罰。疊見。必不能依限完公。停陞待罪。竟成廢鋼。將來不知何以結此局也。去歲長家兄渡江時。多承雲誼。并及小力開罪門下之處。諸凡皆不佞過也。埃台駕抵都時。當泥首以謝不遑耳。關上風景何如。知門下才福兼至之人。自必有佳況也。鄧元昭夫子。乞念及淵源。

時時照拂。不佞廿年索莫。負知己者不可名狀。方將無以自立於天地間。門下肯代不佞稍進教焉。與有感佩矣。仲調年兄。此際想聚首。何樂如之。賡明曾一過從否。此君好義而貧。淵明瓶粟。不致相累乎。此今瓜期已及。計晤對時。或在初秋。南方溽暑。萬祈珍攝。來教領悉。容謝不一。

張明府錫懌

二十餘年。道義骨肉之情。遙望音徽。如在天上。昨晤魯公。知文旌適臨敝郡。把臂在邇。喜不能寐。緣敝居淺隘。蓬蒿之徑。不足容高賢之駕。有艾舍甥居。稍覺軒爽。已令懸榻以俟。正擬遣价奉迓。先辱手教。極荷注存。揣此布謝。卽日面傾積悃。諸不及贅。臨楮翹切。小兒囑候。老世臺先生。賤名單具。

春初舍親王克成入都。曾以一行奉候。想達記室矣。每詢南歸人。知門下近履安和。聲望日著。朝野俱傾。注公輔之擢。故人雖臥滄江。分東壁之光。欣慰又何如也。茲因舍姪澤復。應試之便。復此附候。舍姪爲先。叔學憲子美公冢孫。敝同門釋翁先生玉潤。才品頗佳。想高軒在敝郡時。曾已識韓。茲來晉謁。祈門下青盼對之。曲爲揄揚。卽感推愛餘。非有所干請也。另有裏言。托資門舍姪轉達。幸垂照不盡。

別來數載。知己骨肉之念。時切於心。而南北阻修。未由把晤。昔在稜陵。揣使叩候。荷蒙雅愛。惓惓不勝感佩。足下膺特達之知。處郎官之重。盈門桃李。聲望日隆。不肖叨在故交。與有榮施矣。兩年來爲老父抱疴。日事湯藥。今已幸就痊可。止以親老家貧。連遭荒歉。不免北門之歎。倘有出仕敝地者。祈足下留神專囑。夏初偶過禾中。秀令李君相待甚薄。又以公正發憤爲舊令屠伯所辱。況味尤屬不堪。此人革任。而鞭棍

橫及多人。飛詐遍乎閩邑。奇貪異酷。述之大堪髮指。同邑秦兄。僕筆硯交也。其人英爽真摯。大可結納。特有裏言。囑之奉商。幸足下進而教之。救民塗炭。爲我輩種德事。不止一邑造福耳。餘情種種。非筆墨可盡。如有便羽。希惠好音。

己亥之春。與門下握別城隅。屈指已九易裘葛矣。每念雅誼。感不去心。六益兄歸。具悉近況。知更肆力於詩古文詞。喜慰特甚。嗣從舍弟處。得接手訊。聞捷秋闈。踴躍可知。更望來春大魁高擢。爲故人光寵也。賢喬梓叔姪。孝友風雅。瑞鍾一門。而不佞得以一日之知。叨附孔李之契。暮雲春樹。百倍恆情。未審快對當在何時也。不佞罪放以來。南畝半荒。困阨已極。所幸高堂無恙。稚子在庭。而登臨詩酒之興。尙復不淺。但苦塵冗紛然。不能力學。著書成一家言。以副知己之望。異時相鉞譚衷。滋深抱愧耳。偶刻二種。附呈。察政恐中有忌諱。切勿示人也。同人中如謝兄賓。馬兄瑗。李兄憲。程兄佩。呂兄律。不及另啓。俱望一一道念。使知故人好在足矣。旅次偶逢舍弟入都。草草附候。諸未盡悉。生錫懌頓首。

前勞尊使至舍。慢去爲歉。日來時望旌賁臨。懸榻以俟者久矣。想因尊宄。未卽惠然耶。不肖時欲赴郡。一候行臺。而俗冗糾紛。刻下又以掃墓往鄉。未能如願。望前二日。家兄壽誕。鼓棹茸城。奉迎台從過舍也。先此布候。臨楮神馳。

歲自亥春把晤。叨擾德門。承足下情文倍摯。曲盡款接之禮。握別依依。十年來如一日也。嗣聞賢書高擢。隨捷禮闈。又以聖天子臨雍盛典。超擢儀曹。粉署含香。盈門桃李。在足下可謂極遭際之隆。雖故人搖落。

與有榮施。可勝欣慰。別來連得手訊。深荷不遺。近在駐節秣陵。去敝鄉止數百里。而遙。每欲鼓棹一候。而以家君年屆古稀。適抱危疾。周旋湯藥者四月有餘。難以痊可。此心耿耿。未遑如願。特此先勒數行。奉候足下。回京之期。當在何時。幸惠德音。以慰懸注。戊榜貴門下諸兄。乞示姓氏一單。晤間希爲齒及。以見水木之雅。尤佩高誼。鼎爵董書二種。出自鄙悃。不敢具套。并祈鑒入。臨楮不盡瞻溯。

金明府煜

燕越阻脩。良晤維艱。馳慕之私。想同之也。丑之冬。舍妹丈自京門旋歸。荷兄翁所致一函。具稔至誼。不意所事不果。可勝惆悵。前函尙存。俟另日乘便繳記室耳。啓者。敝鄉平子遠先生。越中名宿。天下全才也。都門縉紳碩輔。靡不重爲斗山。其文章歌詩。氣誼經濟。度邁倫伍。實有不可一世之概。以故聲望滿長安。交遊徧宇內。且與不佞素稱莫逆。風雨同心。晨夕晤言。非一日矣。茲者訪友金臺。企兄翁之雅。進而摳覲。凡有可以爲子遠先生地者。所不吝多方揚美。曲爲玉成。心銘臆誌。豈僅于老一人已哉。顧在兄翁。慎勿以不佞爲曹邱之請也。亦曰以素所相契者。達之足下。以天下所共推交重者。聞之足下。知兄翁定當心鑒也。太翁暨秩宗令兄。希爲叱致。不及另柬。臨風瞻溯。餘悰縷縷。願言不宣。

別后。倏彌月矣。盈盈一水。不啻相隔萬里。跼懷日夕在抱。貴銀鹿至。備詢年兄近履。康勝。曾有茗上之行。目今尙在鴛湖。渴欲一到嘉禾。以看烟雨。偕足下再爲談心。奈緣俗務所糾。未獲如願。悵也何如。蒙云稅契一事。已經印出。荷年兄志學之數。臆誌心銘。至帖雖一次更正。皆雅誼所致。而未能常若如此。亦惟有

付之度外而已。不佞數載家食。仰屋興嗟。從未以窘狀相對。諒年兄必知之悉。倘便中郵寄衡齋王父母函內。希加意道及。不佞蕭蕭近況。每事注眷。卽如躬賴垂照也。明春意欲前赴京門。有懷欲吐。想定勿我遐棄耳。臨風瞻溯。不盡所云。

戴府丞京會

青門惠餞。感昆玉雅誼。不置。反里少圖。養痾。不意卽有鄰警。飲食夢魂。總無寧晷。而貧落更不待言。時念都門周旋。尙不寥索。見邸抄。知借金天官清通簡要。斯地與斯人。正相當。喜甚喜甚。令兄又留玉堂。直令人羨健。而故交如僕。懽慰更異尋常也。武定張容菴入部之便。草勒附候。容菴氣誼過人。才情亦超軼。貴鄉待罪時。甲午拔士也。其臭味當與門下有針芥之投。幸垂手接引之。諸張公能口述。不具悉。令兄同此致候。不另柬。

劉中丞芳躅

年來潦倒無聊。資生乏策。往來燕山易水間。自顧可慚。亦可笑也。計拙無衣食。途窮仗友生。殆今日咏乎。頃在奇峯學舍。拄藜刈麥。接得從子手稟。應考職之試。總之此時壅滯。難以得官。不如得少優於頂帶者。爲榮身計之爲當也。從子爲先伯兄第三兒。自幼在僕左右。敢邀世好。代爲禱祈。幸吹屋烏。列於州同。爲望。文雖久疎。字亦尙堪作養也。僕於望後。亦擬策蹇來京。補夏至祀墓之禮。當面雅誼。曩屢拜注存。皆以陳廢。步未出門。頗多失答。疎節之罪。定荷知己亮之。附及未一。

僕抱病連年。展轉山舍。不返里門者。兩閱歲矣。曩聞尊先人乘箕而去。凡仰芳型者。罔不雪涕。矧僕親炙輝光者乎。唯是不能力趨執紼。特從同人後。一申雞絮。至今歉仄耳。惟門下以禮自持。爲國珍玉。良用遠慰。使旋附候孝思。啓事匪遙。諸容面悉。

道兄居白下之勝區。賦黃初之麗製。驚人之句。定滿篋中矣。不孝自遭大故。萬緒荒迷。於六月初旬。草草扶喪北返。中元前二日。已達潞河。值葆勳弟南還。話別津次。念其襦被阮途。深切懸注。特以菽水事。遠瀆知己。幸道兄推愛。格外潤之。俾邀仁人之粟。以歸奉高堂。卽不孝數千里外。藉慰孔懷。雖在壘廬中。不異身佩渥賜已。臨楮禱切。

張都轉應瑞

曩者帆檣失濟。幾沒廣陵之濤。雖貽戚自人乎。亦數奇偶相值耳。廢棄以來。邱壑是甘。綠野午橋。固未敢希蹤昔賢萬一。然而時命自遣。頗達盈虛。每臨風一嘯。覺怨尤都捐。而身世枯榮。猶未能累我方寸也。門下當衰經傷心之際。乃承不忘夙昔。疊相注慰。加以湔勵。厥情渥矣。惟是驚弓之翮。無意高飛。又況時勢殊昔。更非蹇足頓蹄。思起之日。正未知豐草茂林。何時釋我。尙能再礪鉛刀。以副知己之望否。邊陲未靖。中外需賢。統冀順時節哀。善衛寢興。爲蒼生自愛。所謂移孝作忠者。生且拭目望之矣。因鴻佈復。心與楮遙。令兄年翁。不及另函。希致意爲感。名具單。

張提學鴻猷

睽違道範。轉盼三年。每憶芝宇。惟仰看屋梁月耳。邇者春光滿眼。景物增輝。老年臺福履。與時並茂。榮補在卽。會晤想亦不遙。弟向日校士。恐致迷目之誚。今雖量移。大有蚊負之懼。何當遠念。敬謝敬謝。承諭事。弟卽特懇家孟。已慨允留神。勿煩清慮。謹此奉復。兼候新社。臨池依依。

曹太守首望

不晤道範。夢寤爲勞。老年臺典禮南宮。思皇多士。以視弟之伴食河濱者。眞雲泥隔矣。茲有敝業師諱朱清豐者。豐庠寒士也。半生螢雪。甫就廣文一席。萬懇老年臺拔之前茅。庶幾河清可俟也。卽達之堂翁。無不可者。伏候崇禱。臨穎馳溯。

謝御史兆昌

憶夏間分袂。裘葛倏更。瞻企之私。與日俱積。老年翁剔釐多方。商民咸戴。因知大經濟人。事業迥越尋常。萬萬也。欣慰欣慰。弟碌碌寡緣。素餐自媿。不敢擅附魚函。有溷清思。惟抱疎闕之憂而已。茲啓家表兄孝廉范諱克禔者。近以就塾宛城。匆匆南下。與弟卯角問業。同體關情。幸其道由駐節。敬修尺素。令謁崇塔。祈老年翁推國士之愛。弗靳春風而和煦之。銘佩不特家表兄已耳。臨楮惓切。不盡依依。

高觀察恆豫

久睽芝範。企慕良深。第俗緒勞勞。弗獲趨聆塵誨。殊爲悵惘耳。承諭自當仰遵。奈昨已定議。不能復更。非敢故方台命也。草此奉復。幸惟鑒原不一。

王尙書日藻

星迴律轉。歲序將更。東閣一枝。早逗陽和。景色想老年世臺。經術旁昭於啓事。詩才仰繼乎臨沂。履泰運以宣猷。對芳辰而屬句。景禧滋至。孚契彌深。企羨之私。奚可言喻。秋初辱賜瑤函。并貽瓊玖。屬以順郵。裁報未罄。縷忱。茲草蕪律四十韻。藉用椒觴。北望五雲。滯毫莫罄。

桑參議開運

老年臺瑚璉重器。望高山斗。遙想仁風。悠悠我思。自憶都門聚首。常聆塵誨。霏霏玉屑。迄今猶在耳畔間也。春序融韶。老年臺福祉駢臻。無容遠卜。弟迂拙散材。濫竽珂里。正愧螳臂當車。所幸指南有藉。辱承臆貺。俾弟益增惶悚。而老年臺千里隆情。不敢堅卻。謹登錦卮。餘儀就伴附璧。一切雲誼。嗣容面謝。匆匆草復。臨池曷勝悚仄之至。

于進士璉

日望老長官早到。爲衙門主持。且侍得藉以息肩歸省。不如別項告假之屬。託詞也。昨見暫以恙請之疏。殊失鄙意。仍祈速出東山。侍當作湖海散人。以慶榮遷耳。雅望原自出羣。而諸堂臺揄揚更切。足稱兩得。已將台意致之矣。大年兄執照未到。他人俱駁。以老長官故。止以再議了案。其繳之遲速無定限。卽遣人與親身皆可也。各長官俱道台意。并復不一。覆稿呈上。侍名另具。

張太傅英

日來未得奉晤。小兒卷聞已在部中。幸年兄入署時。查示萬萬。弟英頓首。地輿圖爲芳傳家兄持去。竟不見還。奈何。無以奉覽。幸亮之。弟英頓首。

孫處士焯

老年臺以聖系而膺帝眷。久爲當代所景仰。小兒在豐。得托門牆。永締世誼。誠三生之有幸也。弟時擬鼓金陵之棹。親承芝宇。以慰鄙懷。奈去夏謁蹶于報費。秋卽有遣兒婦往北之役。三冬飛雪積旬。今又綠文衡在敵郡。坐是有懷輒阻。而中心之神馳無已。茲者令叔老先生賁臨。捧讀瑤函。恍如提命。但弟僻居鄉曲。不能常隨侍。令叔老先生之側。至所委又不得當。負疚益深。台旌指日北上。小兒在署。伏望多方栽植。不啻再造之恩也。荒函率復。不盡縷縷。

燕臺別後。數載企思。幸遇台旌南指。小兒獲聆教言。且悉福履萬安。忻慰忻慰。夏初。暫詣會城。忽患河魚之疾。卽鼓歸櫂。聞尊駕將至敵郡。準擬望風晉謁。一罄積忱。前讀翰誨。諄諄感同骨肉。知蒙賜顧。昭慶茗行。尙待稍涼。弟又爲暑雨經旬。蒿目巨浸。未及至省。稽此良晤。衰年種種疎懶。罪歉殊深。茲值小兒趨侍左右。率此奉復。惟冀老師臺先生。以時珍攝。爲國自重。遙情縷縷。臨穎瞻溯。

王學士尹方

夏斗巖至都。得悉老年伯近履。後接台教。如覲紫芝。欣忭欣忭。前所委事。姪明知難行。故欲假手觀玉。以圖得當。不意渠漫不經意。至臨時始將原札發出。致彼此兩誤。至今舍弟輩。尙不敢與此童覲面。皆觀老

之過也。原札去歲臨行時。不知收歸何處。今於書笥中翻尋數次。絕不可得。俟檢出時。寄去何如。姪自浙省回後。終日病鄉。氣息懨懨。漸無生理。而他省之主試者。反揚眉吐氣。奮發精神。此事殊屬不解。意者文運漸衰。黃金勢盛。白雪無光。姪之所爲。亦自取逆天之咎耶。今已貧病交作。勉強支持。正不識究竟何似耳。因便附候。再呈拙刻三種。新稿一部。統希教定。諸祈慈諒。臨啓曷勝依切。

劉郎中始恢

冬仲拜別。倏易葛裘。時序易遷。懷思彌切。都門聚首三月。極荷老先生世臺骨肉之愛。古道古心。至情至誼。每一念及。感勒久之。當波靡之中。有此大賢。真中流砥柱。侍實爲之心折。非敢諛也。先叔謬叨一日之知。承老先生世臺諄諄念及。真令人感入肺腑。侍於展墓時。默陳古誼。想先叔亦啣結於九原也。侍閉戶守拙。一切聞見甚短。凡有可相關者。務望留意。家兄就試中翰。現寓都門。倘有大札。卽轉付郵寄可耳。敝地如有新任公祖出都。統祈齒芬。俾家居不致岑寂。其感佩曷有既耶。大世翁不及另啓。統此致候。餘衷縷縷不盡。侍名正勒。

張少保鵬翮

入春以來。兩讀手教。深荷垂注。計事得邀照蒞。感不去懷。東郡一章。出自公心。惜乎爲例所格。乃老年兄亦加扼腕。縑衣之好。實有同心矣。復聖門坊傾圮。弟旣居此邦。自當力任其事。不待諄囑。至書院顛末。藩司覲旋之日。已聞大略。今台諭復及之。容令司道郡邑。熟籌以報也。辱在契厚。諸凡幸爲留意。不吝指函。

是所禱切。漣源倡和詩。小清河議二刻。奉塵清覽。老年兄爲海內宗工。乃自忘其陋。舞斧於大匠之門。眞不滿一噓也。弟名箋具。

客夏重承教愛。瀕行復荷寵餞。飽德銘心。曷有紀極。履任來簿書。執掌心勞。政拙久稽。謝悃時切。悚惶承諭。貴鄉所行事宜。翻雖賦質。駑鈍敢不竭蹶。遵奉幸藉餘波。東魯時和年豐。民生樂業。貴桑梓亦無不拜。老先生之賜矣。去秋得瞻復聖廟貌。益切景行仰止之思。近閱邸抄。知有榮遷之喜。由此端揆節鉞。指日以竣。殊爲欣忭。專力肅賀崇禱。不腆侑函。伏惟鑒茹。臨啓馳溯。

吳尙書一蜚

都門叩別。復屆登龍令節矣。斗山在望。無任神馳。敝治係塞外彈丸。荒涼萬狀。且又當往來要衝。迎送之勞。供應之苦。不可言喻。近復調入內簾。襍費不貲。將來考成之事。殊切憂心。外吏艱窘之狀。有不堪爲知。己道者。承老年兄厚情。未遑圖報。令人愧赧無地耳。闈中分閱易經。與沁源馬邑兩公同事。其中倘有簡默不到處。萬望老年兄曲爲照拂。感佩高厚。靡有已也。草勒荒絨。恭候興居。統祈原宥。臨穎翹切。

夏處士州梁

漂泊西南天地。已越冬春。調饑顏色。遽覺仙源是故鄉矣。今東君北上。弟亦東歸。前肅械兩次奉候。曾達記室否。公郎學業。想已大進。豚兒在京。屢沐青照。感懷何已。歲月飄沉。關河闊絕。瞻晤不審。在何時也。聊寄土物二色。萬里鵝毛。浦將遠懷。伏惟叱茹。拙稿數篇。呈教臨池。曷任依注。

於參議覺世

老伯大事。未能執紼臨壙。以伸猶子之誼。五中愆然。迄今未已。有自貴縣來者。爭傳年兄哀毀之中。祭葬一一如禮。以此知年兄孝思。固度越倫等。而經緯榦濟。更自非常也。弟久病之後。懷想教愛。夢寐維勞。捧誦翰教。如久別故人。思獲快晤。不覺霍然。當茲溽暑炎歊。惟冀年兄節哀自玉。恢鴻大業。以顯前人。則又孝之大者矣。來管邇發。強病率復。不盡百一。

魯通政超

輜軒前賁雲間。得以晨夕侍聆教益。奚啻黃叔度消人鄙吝心也。違晤雖無多日。而瞻戀縈懷。卻似三秋之久。何令人之思慕。一至於此。武林佳麗之地。得老先生大人行旌至止。品題歌詠。湖山草木。倍開生面矣。遙望紫雲。殊深洄溯。頃接尊諭。捧讀之下。仰見高雲。周詳篤摯。感佩何極。當備勒心版也。大駕臨松。在即。接膝非遙。統俟面罄。先此謝復。臨池翹切。

祖府尹允圖

臘底一別。彈指春深。迺望璇霄。彌隔塵埃。弟待罪珂鄉。繁劇萬狀。前承瑤函。遠及未遑。修候起居。歉仄殊甚。老年臺先生。領袖人倫。澄敝羣品。遙瞻紫氣。已映台躔矣。茲有啓者。曹邑監生趙從大。父子濟惡。賊款纍纍。撫軍震怒。必欲訪拿。以除一方之蠹。今伊子趙嶠。潛入京都。未審作何勾當。忝叨肺腑之誼。率此奉聞。幸爲留神。敬候回示。匆匆不莊。統希鑒宥。不宣。

客歲握別。至竟隨謁大翁。溫恭閒雅。冠冕東國。方知老年翁本源有所自來。奈緣行間碌碌。不獲時親笑語。後又奉命移荆。并老年翁與居。亦未遣候。至今歉仄。錢生重蒙作養。弟實銘刻。但以後照拂。望老年翁終始以之也。至弟一身從役。百事遭連。兀坐江濱。未知稅駕。老年翁鴻猷碩畫。胸中定有成算。不識能一指示否。春華燦發。淑氣迎人。福祉諒多。駢集德門。草草泐候。欲言未罄。

張中書鎮

前者大駕賁臨。獲領教益。契闊之懷。於茲稍慰。極欲謀一尊邀敘。而台旌邁發。未遑少盡地主。歉何可言。尙擬再過敝邑。一罄積悃。不意遊屐久羈。日深翹企。昨從家孟處。讀手札。知仙舟已抵吳門。渴欲趨候。攜濁醪數杯。同醉生公石畔。而歲前多冗。未得如願。悵快無似。老先生以命世偉人。處得爲之地。將來勳業。正未可量。不才如弟。淪落自甘。優游終老。所恃雲霄知己。垂意剪拂。公祖田文宗。父母大令。俱乞不吝鼎言。一爲諄托。俾田公念及寒暑。追隨史公。俯推烏屋。草野鄙人。榮施無既。皆荷老先生嘯植。寧有涯涘哉。荒槭附候。臨楮神馳。

臧御史眉錫

都門侍教以來。條已三匝月矣。過荷雲誼諄諄。有逾同懷。鏤刻五內。曷其有既。願候青瑣黃扉。以慰鄙懷。然屈指亦指日間矣。弟因狼狽出都。自覓費之艱。稽遲至於閏五月到任。一入魯境。滿目荆榛。百無一熟。

人民寥寥。絕無市集。然固窮之教。分所宜受。猶幸者。僻耳簡耳。僻則無兵馬之苦。簡則少供應之累。豈料初三到任。卽有皖兵移駐之文。百孔千瘡。左支右吾。至於從前雜差之弊。凋殘之病。筆不能道。以千百僅存之子遺。半爲差徭所驅逐。有鬼無人。有土無屋。竟不成邑。言之於邑。聞之駭絕者。老門臺愛我。將何以教我乎。鄭俠之圖。豈足繪其一二耶。李管精明幹才。不必言矣。亦因困苦之狀。日日告退。弟勉留之。亦五日京兆耳。適有便羽。先此附候。入秋尙容差人走叩。馮夫子一札。千祈面致。并道弟地獄之苦狀。生我成我。或援而救之乎。他若掣肘之處。貽累之事。巧婦無米之炊。功令苛求之類。尤不敢述之。左右者。回想丁未連驢之日。今春聚首之時。其可得乎。惠子知我。幸起之枯鮪爲禱。諸同人處。不及遍啓。千祈叱名。鱗鴻不遠。荒函之罪。統祈慈宥。臨穎主臣。晚弟眉錫頓首。

前者敬脩小札。郵寄塵覽。想老門臺新禧倍佳。指日梧垣竹埭。使風塵下吏。得荷栽培。感何可言。都門過荷雲天。銘刻無旣。不意菲樛如弟。筮此瘠土。幸簡僻庶。可藏拙。詎知兵馬之旁午。天災之暴厲。荒疲之狀。筆不能盡。尤有甚者。向因安插之未當。致軍民之多故。張弛之際。寬猛之間。有大費籌畫者。老門臺愛我。將何以教我乎。至於糊口無策。冰暑蕭然。此吾輩分內事。不敢訴之知己者。前有一札。呈馮夫子。想已致之。梁夫子處。亦祈緩頰。但兩月內。大兵迭至。不擾一民。大雨滂沱。虔禱卽霽。流移之民。歸者日多。屯營之悍危者。復安。弟之告無罪於知己。以告無罪於朝廷者。此耳。至於多方提攜。尤恃二天之在望耳。便羽附候。臨穎主臣。李使幹才。惜窮邑困頓。屬稟候萬安。同人前乞叱名。郵報上乞示一札至禱。小弟名另肅。

獲附驥尾。已快平生。乃復蒙雲誼殷殷。真如就日飲醇。不知其煖。弟匆匆策蹇歸里。遂違笑言。每憶芝眉。疑在天表。不識比來道履何似。想年兄讀書中祕。化日舒長。樂可知也。弟自返里中。一味杜門。不知戶外何事。但奉七旬老母。日夕盡膝下之歡。卽蔬食菜羹。自覺甘美不厭。弟未審稅駕何日。出宰何年。修職業以報知己。未免搖搖耳。肅此附候。愧乏侑緘。伏望鑒原。臨穎悚仄。紀年兄不及奉柬。祈叱致弟名單肅。

施方伯天裔

接發初六八日兩次台函。具見真切婉轉之至。感激感激。令兄价回。賚到尊札。卽當如教祇遵。而行一氣之說。洵爲直截。諸惟老親臺張主酌定爲之。弟自是踴躍。勉圖以應。前所言銅原是無多。皆數在各商。陸續於臨關賣去。今顏親翁須銅。必須另行覓購。但地方缺乏銅觔。浙藩袁輔老。差人東來採買。臨清關又以缺銅徧覓。一時銅價騰踊。且買銅托人。甚爲難之。銀入其手。卽爲己物。弟十分拮据。追呼尙餘千金未清之價。茲爲老親臺許顏親翁踐信之故。弟當力任採買之事。此處多方覓購。亦得八分五釐一觔。或可覓三萬觔之數。卽賠償數百金。以報台命。仰承老親臺踐宿諾之意也。其銀留用。諸惟知己心照可耳。臨穎可勝翹企之至。不盡不盡。弟天裔頓首。

任明府楓

夔承雅誼。銘感之忱。與闕別俱長。茲復承注問。天上仙班。猶念泥塗中有故人。此德此情。具有心胸。能不耿耿耶。奈弟時命不猶。墜落衝途。百苦俱集。真如坐地獄中。受諸惡趣。將來但求生還故里。便是厚幸。敢

復作功名想哉。以此負年臺提攜之意。誠足浩歎耳。其襟肘之狀。筆不能悉。遽使當一口之也。敬托八行。藉手起居。薄儀伴函。仰祈莞恕。倘天念苦人。不卽淪沒。尙容圖報於異日也。年伯壽啓。聊抒猶子華祝之誠。然自媿布鼓矣。區區之衷。惟冀鑒原不盡。

李侍郎迴

都門數年共晨夕。備荷提誨。顧良晤無幾。年兄遽歸讀禮。聚首之感。時廬寤寐。客冬老年伯卜葬之吉。不獲與聞。既未能遠將雞絮。躬奠靈右。又不遑遣子姪輩代効執紼。猶子之誼闕然。能勿歉仄滋深耶。乃年兄既不過督。更辱垂注。感慚交集。竊憶服闋在邇。惟台旌早發。以慰蒼生霖雨之望。翹切翹切。謹此布復。臨楮依依不盡。

郭給諫昌

自違台範。已屆深秋。洄溯之私。與日俱積。弟以匪才。謬典晉闈。公慎之懷。天日可矢。但入闈未及一句。而監臨以大兵卽至。欲親自料理。敦趣放榜。至於再四。弟以軍機所係。不獲已於十八日竣事。其爲匆遽。實從前所未有。兼之山右人材。劣於他省。時日既迫。僅取充額。至若諸當事交際之間。況味索莫。更甚於往時。凡此諒皆在老年臺洞鑒中者。今諸卷俱已至大部。校閱之時。皆式遵功令。其間字句。或有未安。此係謄錄之誤。皆已細細抹出。惟懇老年臺特爲照拂。并祈鼎致同事諸公。稍爲寬假。俾弟得免衡鑒不精之戾。皆出老年臺之鴻造矣。專函奉懇。更托沈余兩敝年伯。轉致鄙私。惟冀崇照。臨楮可勝主臣。

方中丞大猷

展叩瑤階。老年台握手道故。青眼相視。優渥極矣。弟囊空如洗。沿門持鉢。竟無定寓。暇當過訪。不敢勞尊駕也。張公處。昨許賜鼎函。伏祈留神。最汗顏者。弟旋里不得。欲求老年台轉貸三五金。未審肯作此瑣事否也。恃愛唐突。自顧內慚。惟老年台古道自處。想不鄙此舊交也。旅中文房未便。草草宥諒。制年弟大猷頓首。

張參議永茂

習習新涼。秋衣殊爽。彷彿披塵訓於清襟前也。欣接翰言。深慰饑渴。然永茂謬承糧儲。實切蚊負之懼。惟藉知愛如老年臺先生。奚啻芘之以幃。而滋之以露乎。辱荷雅贖。另容圖報。餘教書紳。臨風可勝心醉。此復。銜名另肅。

鄭提學僑生

握別來。經年積緒。咫尺未通。實深悵歎。年兄福履。諒在佳暢。弟叨職已期。一無善政加民。何當優舉之過。及也。令親孔年翁過署。緣荒邑窮員。不能厚有所及。何以謝命。茲順羽便還。率附荒函。祇候清居。伏惟崇照不宣。

許給諫承宣

幸託淵源。方以獲承音旨。慰十餘年渴饑。不意復爾遐阻。徒令我厖東山之望也。遽使至。得拜手函。稍慰。

翹切。老師叔騷壇宿望。當此鍵戶讀禮時。正可放懷嘯咏。想琬琰盈筭。以之應聖天子風雅之選。自有神契。可不蔡而知也。晚目下有纂修之役。欲得尊府陋巷志。以資考證。已於夫子稟函中致懇。并希注神速。惠臨穎不盡依依。

王尙書隲

計與老年翁遠離。十數餘載矣。其間吾鄉之卓越飛騰者多有。而文章聲望。則君家兄弟真不可當。弟里居遙存。佩服切至。時以隔遠。疎候爲歉。入都又復相左。季春賫表時。得聞起居於桐江處。回閱邸報。見老年翁旣補而旋陞。不勝雀躍。弟揮出荒蜀命。軍前拮据年餘。備極勞悴。所事粗就。比之古人不敢當。較之今人無多讓也。然所費者稱貸之錢。所辦者耘田之事。一番勤苦。卒同逝風。豈非拙者之效乎。山川險阻。隔在異域。恨不能向知己一傾吐也。茲借胡貞巖先生入覲的便。肅此敬候台履。新禧萬安。附呈詠懷十二韻。雖不成詩。然亦然鬚數斷而得也。幸勿以短歌擯之爲感。臨穎馳依弗旣。

徐中丞相國

別來又幾一載矣。每憶知己握手談心時。不可多得也。春初入省。雖不能留益地方。然硜硜守拙。無愧乃心。差足自安耳。適接翰教。知老親翁秋初發駕。深以爲喜。情多關切。不待諄諄口吻間也。佳惠遠頒。不敢固辭。謹登款爵。用誌高雅。一片伴函。殊慚輻褻。草裁附復。并候近禧。臨楮可勝瞻溯。弟名另具。大老師在安順。想萬福萬安。弟於五月間。晤丁制臺。已諄囑之矣。并此附聞。又拜。

魏觀察學渠

西冬都門言別。辱老年臺雅誼稠疊。感勒心腑。嗣聞校士南宮。而得人爲盛。司筦江左。而惠政遙傳。徒以音驛疎闊。未獲申賀爲歎耳。頃白年翁入楚。得接瑤翰。兼讀闈書。如侍色笑。深荷垂念。所云鄒子蚤已遲命矣。若弟與仲老。原係同學宿契。其令兄遠來。值弟熒熒在疚。兼謝事已久。雖黽勉周旋。而于中尙抱耿耿。舟過金陵。以不祥姓名。未敢入謁。聊佈芹私。并復前教。統祈慈鑑。臨楮神馳。歸舟并祈台庇。制弟名嵩肅。

趙太守開雍

曩者承乏東魯。年翁不鄙棄俗吏。琬琰鴻章。虛懷問字。追憶舊游。依依如昨日事也。彈指十載。年翁翔步雲霄。蜚聲文苑。不佞以衰病郡守。予告歸田。亦曾念及蘭譜中尙有此老人乎。頃訪舊石城。去臺端咫尺。特遣小力。泥首台階。不腆之儀。聊申積忱。小刻積有十餘種。皆零星散去矣。謹將存諸行笈者。先呈教正。江上布帆。若未卽發。仍圖面布區區也。開雍再頓首。

衰頽病叟。荷老年翁篤念故人。不遠二十里之遙。高軒枉顧。古誼哉。今人所未有也。賤體纏綿。又在逆旅。觸事增人懷抱。刻下力疾登舟。頭涔涔作痛。不能躬詣臺端。惟老年翁原鑒。所懇轉書。俟當事按臨。有期。令胞弟開禧。親來面瀆也。臨啓不盡。開雍再頓首。

朱處士綵

昨於句曲聊寄數行奉復。想入台覽矣。弟今已抵京口。晤涵老。盤桓竟夜。擬於望後次日長行。此後晤期未卜。中心依依之私。實晝夜不能去懷也。年兄入都遲速。吾三人所見略同。綸兄已先作字田。二年兄大約言年兄自能念同鄉之雅。而樂道甘貧。在桐老亦自應有實際之處。弟之家函亦復爾爾。想不日卽有回音。斷乎不致落空耳。連日清恙當已全愈。打鐘固不必言。復有餘興鑄銅否。并望示知。山東試錄。涵老處亦未曾到。統此布聞。不盡馳依。

地間咫尺。渺如天際。每憶曩春趨叩台塔時。蒙兩年兄過愛。飲食教誨之德。迄今宛然在意念間也。茲接手翰。捧讀恍悟有道丰範。兼荷垂注殷殷。五中感勒。曷有涯哉。時序迭更。條已節屆履霜。兩年翁先生孝思興感無已。幸惟抑情自玉。以慰鄙懷拳結。羽便肅候近履。統希丙鑒。不盡馳切。

朱學博絳

寒門不幸。忽罹先伯父變故。過蒙雲天高義。沒存并爲銜結。弟乞假歸里。日經營喪葬。未遑脩尺一。伸候孝履。正深歉仄。忽接手翰。慰藉慇懃。雅愛隆情。益深銘勒。別諭已悉。家兄函中不敢多贅。羽便率復。并候近祉。臨楮翹切。不旣依依。

沈修撰廷文

去冬傅年兄歸里。接手翰。深荷垂注。感何可言。年長兄晉陟清晏。雍容翔步。八座可期。而且琴瑟克諧。賞心悅目。大福澤人。固宜有此耳。偃蹇如弟。家居困頓。不知何日得補一官。與吾兄弟歡然道故也。室中吼

聲稍息。附聞以當一笑。茲以小侄探親入都。代叩大年兄。年兄闔府萬福。敝縣新父母王公諱天壽者。爲旗下筆帖式。不久到任。敢乞台駕親往一晤。鼎呂道意。或開一單云。候補某名。更感。茲接官衙役數人。忠厚守法。或可便中一言。特令叩首台端。並酌之。臨筆依依。不盡。事例全停否。卽用先用確數。乞一一示下。祝祝。

許員外聖朝

別來八閱月。傾慕無時去念。前於清和。得拜德音。骨肉之語。溢於墨楮。弟感媿交集矣。夏仲聞新旨。有中翰之選。卽爲吾兄屬望者久之。及覽邸抄。已知巍然高列。歡喜欲狂。綸扉要地。以俊才居之。深爲朝廷得人慶。不特吾兄弟分輝已也。謏劣如弟。昂首何時。惟望年兄錫之教言。砭我屯蒙。并惠佳篇。以爲楷式。幸甚矣。年伯年伯母。納福可知。曾迎養都門否。年嫂在京。抑在家耶。乞一一示之爲慰。今以家兄入都。敬候新禧。諸凡更懇指南。維持足紉至愛。茲具不腆。少伸賀私。萬惟叱存。扇頭俚句。可供一噱。並希削正。臨穎馳戀。不盡欲吐。吾鄉年友。及別省諸公。硃卷并惠數冊。望新詩賜一讀。更感弟名另具。

去歲夏間。大年兄道經敝郡。曾剪燈爲竟夜之談。一洗兩載渴塵也。瀕行附數字。候年兄起居。自久入掌記矣。今閱邸抄。知大兄榮補。邇聞台駕有江南之遊。想亦當早晚入春明也。偃蹇如弟。無足比數。滿望年兄爲一疏通之法。便造福無窮耳。茲宗姪許祺。慕闕里之勝。兼訪沈漢老。此子繪事頗工。如年兄處有燈屏等類。可命効勞。非尋常畫士營營逐逐者比。羽便專候近社。憑穎馳切之至。

數年契闊。梁月之思。時勞夢寐。向知年兄久遊江左。桃葉賞心。令人健羨。但不識河東先生。見之猶憐否。榮補入署。清通望重。從此雍容翺步。晉陟崇階。在指顧間耳。弟困頓無賴。家居數載。苦無佳況。不審何時。得人長安。共知己快聚也。乞留神查示。弟上邊共有幾人。目前無別項事例。源源而來者乎。南遊吟咏。必多佳刻。幸賜教。茲以傳年兄北上。敬候近祉。無緣言面。臨穎但有神馳。大年兄道意。容再報。咫尺龍門。心密形疎。誠恐年臺事冗。未敢時煩起居。弟以兀坐衙齋。又不便常爲出入耳。忽聞報命在邇。不禁悚然。榮行定於何日。如有暇晷。弟當馳走階前一別。以見數千里外。故人相遇。存此戀戀之私可也。專伴敬請。幸惠好音。前紙求書賜下。弟名另具。

顧處士雲臣

謬承老先生台愛。委寫待漏調琴圖二幅。塗鴉之伎。殊不堪入大方之目。歲朝復蒙降重。諄諄話別。敢不以病軀力疾。勉握管城。祇以撫軍命晚。雲寫照。方苦辭咎不能。故爾稍爲延緩。今如命附呈。惟祈臺宥。不工之罪。隆祝遠頌。謝非筆罄。不識旆帆北發。可能再渡吳門。使鄧尉梅花生色。倘可噓植處。萬望老先生多方留意。令親社翁。統惟叱致。臨楮曷任翹切。

李處士漁

昆季聯翩而起。又同仕廟堂。不分內外者。自崑山三太史而外。指不數屈。澹圖修來兩先生。其匹休者也。野老入都。聞此等盛事。不可無一語紀之。謹撰一聯。以拚尊壁。未審有當否也。前以賀書鄙事奉托。想荷

留神行期日迫一日幸早圖之附聞不一

前以買書瑣事瀆聞想爲留意茲行期已屆乞示德音即購者寥寥亦求自用一二十部輕我行裝爲惠多矣立候回示不盡晚弟李漁頓首修翁老年臺大人

來單一紙即求專役代傳其求售之故及價值多寡悉在其中可省一番揮翰之勞但擇可與言者幾何人悉發尊劑煩貴役面索所用書單則此事半日可了至查各書分送亦易爲力多去一部少受一部之累早去一日少擔一日之憂皆知己之賜也貴役自當勞之即日遣行是禱

漁行裝已束刻日南歸所餘拙刻尙多道路難行不能攜載請以買之同人或自閱或贈人無所不可價較書肆更廉不論每部幾何但以本計每本只取紋價五分有套者每套又加壹錢南方書本最厚較之坊間所售者一本可抵二三本即裝釘之材料工拙亦絕不相同也不用則已用則別示一單以便分送書到之時即授以值不誤行期至感至感漁具

王中書士驥

公集以後匆匆旋里造謝不及負咎良多弟於時意欲南行以爲白下仍可相晤不謂資斧不給終於不果憶老年門臺簫鼓樓船峭帆金焦之下壯遊高咏正堪羨耳茲家兄士表代候近社特懇推愛教之俾其行李得達粵東則愚兄弟均戴高雅矣臨楮南望不盡欲言

顧芳善侯啟

弟被放南歸。未遑趨賀。左右客冬因坊人有拙選源雅之約。更承敝郡宋旣老。蔡九老。章鶴老。諸同人見托。祈老年翁卽惠瑤章。以便彙選。臨楮無任翹切。瑤章乞寄西河沿豹變齋書坊。名單具。

成侍衛德

成德謹稟太夫子臺下。前接手諭。因悉起居佳勝。翹首南天。益增悵望。悠悠夢想。願飛無翼。種種并志之矣。使旋布候。不宣。成德頓首。

史詹事夔

日來館課碌碌。未獲聆教爲歉。茲啓家表叔陳諱宗石。向曾以領誥命事奉懇。適有彼處衙役。明日回縣。老年伯如已爲彼領出。乞卽發下。幸甚幸甚。餘容面謝。不一顏。老年伯大人。年姪史夔頓首。

捧讀老年伯大篇。理熟程朱。學兼左史。起大雅於近今。振絕響於初古。正希陶菴。差足比肩。餘不足道也。抄本五篇完上。幸檢入家。叔嚮慕已久。渴欲請教。兩日內卽擬造謁。闌墨當自攜到也。呵凍草復。顏老年伯大人。年姪史夔頓首。

楊處士丕顯

別後歸來。又造一在字彙篇。并華山仙方之原文并錄。乃丹房法器。寧可備不用。不可用而不備。果識水沉金浮。實爲延年一助。再備之濟人。乃是補虛療瘵之第一件事。可不知乎。今日秋分。金水平平。人氣在下。人神在腎。正當靜坐調我真呼吸。識得外呼內吸。出實所以入。入則實所以出。古云。君休輕此一聲呼。

八脈適流似轆轤。次第地中雷隱隱。遍施甘雨潤屠蘇。正在此中靜默。又不知台駕榮旋。還到眞州否耶。再得白水豆腐。說方外餘言。以作快談。早示一信。恐其他往。以便候教。近聞糧憲陸道臺風波。台臺早已一口道破。直大儒之明理明道之識見。成先覺者台臺也。我惟爲陸公好人。眞可惜也。不知連日有甚新聞耶。陸公尙可保全耶。若有眞信。示我以聞。何如。再台駕南回。實何日可定耶。外概許闔台前囑之。更望留神是荷。犬兒不敢另稟。神馳不盡。楊丕顯頓首。

余處士國楨

耳芳名者久矣。徒懷山斗之仰。莫遂識韓之願。昨得傾蓋龍門。相見恨晚。乃蒙老年臺雅愛有加。溝中之獸。有汚顏色矣。復承寵召。誼何敢辭。以歲聿云暮。卽擬北渡。然隆情至意。已心版鏤之矣。謝謝江浦徐年翁。係舍弟舊屬。會附門牆。昨冬舍弟北上時。存一檄。屬弟往謁。以家兄之故。恐不敢徑晤。懇老年臺俯賜一札。先於所往。弟卽日北行。郇伯膏雨。可資阮途。幸惟慨然。至家兄事。札內可不必及之。束裝匆匆。不及再候。把臂聚晤。當在來歲夏仲。燕臺復命時也。臨穎可勝依戀。

張給諫惟赤

蒲月舟次一晤。別後曾幾何時。忽又霜楓如醉矣。昨從張幼青舍親處。得接手教。深慰鄙懷。銅斤爲權。關第一義。得如額便可報最矣。門下玉笋聯班。寅清望重。輿會之饒。自可想見。不佞自歸田以後。癖杜甚堅。視戶外一切。絕不與聞。然三徑雖幽。而二豎時侵。近狀不足爲知己道也。適因徐舍親之便。率勒附言。舍

親名賡元者。慕六館之中。英遊羣集。有志觀光。恂恂少年。初入都門。百凡望推分照拂。感不獨舍親也。匆勿布勒。不盡神跋。

范處士

璋 珮

滋陽縣范珮。璋謹稟。切珮曾祖諱淑泰。字木漸。生於壬寅年二月二十三日。中丁卯科舉人。戊辰進士。初任行人。二任工科。三任吏科。四任兵科右。五任吏科左給事。壬午年典試浙江。又轉兵科都給事。場中以暑勞太過。感患瘡疾。迴途病甚。十一月中旬到家。卽遭大變。殉難。年僅四十一歲。蒙總河黃具題。准贈大僕司少卿。蔭一子入監讀書。遺男三人。長男名懷仁。字子人。係府庠廩生。年二十四歲。於順治元年六月。傷寒病卒。次男培仁。字知人。康熙元年出貢。三十七歲病卒。遺一男二女。男宗鎮。十八歲夭折。有負諸恩師培植。二女將近成人。尙未出嫁。季男宏仁。年八歲。甲申年被擄。懷仁遺男景麟。父母俱亡。祖母撫養。順治十四年。麟十七歲。蒙恩師丁諱澎。莊諱遴。二大人。念昔先人扶持讀書。爲滋陽縣庠生。不幸於康熙十二年。三十三歲又卒。遺孤珮璋二人。是木漸先曾祖一線血脈。止珮璋兄弟。珮今年十八歲。身中面白無鬚。璋年十六歲。身中面白微麻無鬚。俱業儒。母孀子幼。兢兢無倚。謹詳陳具稟。伏乞憐憫。先曾祖亦感恩地下矣。

紀給諫愈

孫北海先生著書。統借一閱爲望。容謝未旣。阮亭詩集。亦希惠觀。弟愈頓首。

敝省放榜日期。舊例京兆具題。今日曾見有疏否。適未之及也。希示之。弟愈頓首。
又聞點奉倩年伯。與朱穎老序次而行。則年兄與穎老爲是也。當日車乃長班所僱。聖駕起行。此項最多。
容遣人覓之另報。衙門阜隸。儘可不用。領馬等事。俱不必親往。此復。昨奉訪不遇。午間再當趨晤。外具薄
分八星。南郊竟日之談。足堪絕倒。兼之名園淥水。豁我煩襟。迄今清涼猶在望也。趙掾收標効用之事。有
定議否。希詳示爲荷。令兄年臺。門牆殊卷。賜教是感。

梁進士聯馨

前承年兄體念。知我之感。耿耿銘心矣。尙容踵謝也。咨監當在何日。幸示弟知。以便復彼耳。切切。小弟聯
馨頓首。

李進士彥瑁

前所商者。旣蒙年兄諾發。有緊要舍親。此間尙餘瑣事未結。不久亦將西歸。幸年兄速就外面封固。交付
敝鄉梁峒樵年翁處。萬無一差。弟亦丈夫者流。慎勿以區區小件。作狐疑也。臨行不及走別。悵悵孤弟彥
瑁稽顙。

王司馬穀振

蔡夫子遷居。吾輩當設一公席煖房。張長來言。云是夫子之意。弟思此舉。亦斷不可少。昨已與謝門兄商
之。云兼以祝壽。實一舉兩便。乞年門兄裁之。不盡。來翁年兄賜覽。小弟王穀振頓首。

郭明府昂

郭昂謹稟。昂自臥病以來。賤體虧損。元氣尙未平復。祇因家計單寒。帶病出遊。不意舟車又復勞頓。痔瘡痛楚。日夜呻吟。氣息懨懨。醫藥無效。本擬初九日叩辭。蒙老夫子注留殷殷。不敢造次。至初十日午後。大便時。忽然下血。不啻碗餘。昏臥榻上。衣被盡赤。浸淫半夜不止。奇痛剜心。莫知所措。昂竊自憚。恐非佳兆。想本薄福之人。不應過明知遇。昂之命蹇。何一至此乎。因念離家之日。兒女棉絮不周。妻子饘粥莫繼。留於家者。僅支半月。充行囊者。未滿十金。內外關心。貧病交集。於此時也。卽欲大度排遣。有不可得者矣。昂非不諒老夫子權使苦差。兼多賠費。然而窮兒女有苦莫訴。苟不向慈父母痛哭陳之。則將誰告耶。在慈父母之心。雖或憎其絮聒。亦必轉而憐念也。倘得藉此調養。病痛霍然而愈。生我成我。圖報當必有日。卽或不能邀天之幸。終以貧病而廢。陶淵明所謂。冥報以相貽。亦自有不爽者。昂今急欲返舍。旦夕必行。若明日瘡痛稍止。尤必勉叩階前。以謝明德。否則忍痛登舟。取便而返。惟有稽首翹謝而已。先此布告。臨行再爲上聞。附有懇者。昂有一弟。繼嗣寒族。家貧不偶。讀書未成。聞老夫子處。有贊禮劄付。倘蒙見惠。一紙俾得了其終身。是亦附於門牆之末也。不盡欲言。臨楮翹切。

郭昂謹稟。老夫子台臺。昂一介寒流。蒙老夫子知遇之恩。千載一時。餐花結草。自矢生平。而福命舛薄。得此奇窮極苦之缺。去秋藉庇。方得出都。抵任以來。士傲民頑。靡所措手。額糧二萬有奇。每歲逋欠十分之一。存款全裁。一毫無可通融。而又迫於功令。不得不借墊起解。公私遺負。如水益深。兼之材短勢孤。汨沒

苦海中未知稅駕也。門牆之下久疎，問候側聞，特簡銓曹私心忻忭，而賀忱莫展，轉貸逾時，亦尙缺焉。未報負罪如山，靡敢卽安。乃蒙慈鑒，遠辱手筆，恕之教之，高天厚地，非尋常師弟之誼，所可方其萬一者。昂惟有感泣而已。孟邑僻在深山，不通孔道，耑使則力所未能，便鴻又不易有。適崔門人從此入都，敬候函丈一檄，蕪詞稍見依戀之素。至於晉中上臺驛憲，相待頗優，外此不無危疑之慮，有可以爲昂地者。乞老夫子留意焉。種種積忱，容俟深秋再圖報稱。伏冀鑒原，昂臨稟可勝悚切之至。

孫侍郎在豐

自春明拜送絳帳南行，依戀之私，旌旆同馳。雖仰斗瞻雲，未足寫其勞積也。恭惟老夫子榮任以來，道履清勝，諸事多福，慰藉慰藉，在豐以散材而逢匠石，斧琢所加，欲使成器。在夫子聲名自遠，出韓歐二公之上。小子何人，亦同李翱蘇軾之遇，其叨榮非分，眞異於尋常萬萬矣。寸草春輝，何由報答。惟是力行困學，期於無負宮牆，而基薄牆高，汲深綆短，常恐不克負荷。如何如何，在豐於季夏之八日進館，入則有受書問字之勞，出則有賃舂索米之苦。獨居顧影，形神俱瘁，兼之函丈遙天，指南無自，茫茫塵海，深以隕越爲憂。必得老夫子錫以策誨，示之周行，或不致迷罔無從耳。伏冀俯念樗材，無忘葑菲，倘遇便鴻，時賜郵寄。天上嗣音，不啻親承風旨矣。秋高露白時，家君尙容晉謁龍門，頓謝生成大德，以申御李之懷。先於郵報中肅函稟候，臨啓不勝翹依之至。孫在豐載頓首。

奉違函丈自春徂秋，翹首程門，時切溯洄仰止之想。日承老夫子手示，得悉近祉清和，私心忻忭，但以饒

贛一帶。早魃爲憂。龍江課額。致塵清思。捧讀一過。不勝依結。所可慰藉者。特老夫子鴻福所庇。自然秋濤乍至。可藉天休。以裨國計。幸勿以一時課額焦勞也。豐自數月以來。夙興夜寐。期於無負生成。自分庸流鈍質。才短學疎。謬廁清班。撫躬惶悚。每思古人讀書立業。輒期努力自愛。但恐愚昧無知。不克進步。蒙老夫子不棄。樗材。賜之教誨。真字字金石。頓然開拓心胸。敢不書紳佩服。朝夕勿諉。長安習俗。移人深可戒省。況在冷署冰寒之地。惟有甘淡泊。耐勤苦。力行困學。庶幾勿憂隕越。若稍有縱逸。不第喪名。亦且伐性。自當奉夫子之訓。必不敢出此也。葭蒼露白。極目南雲。惟望天上嗣音。時時郵寄。不啻親承提命矣。夢錦嵩烈三門生處。當肅將意旨。來人行促。不盡縷私。臨稟曷勝瞻依之至。孫在豐載頓首。

老夫子駕駐武林。門人誼應陪侍函丈。乃以俗冗。暫時返棹。心甚不安。綠暗紅稀。春光漸老。茗霽間風景。猶可及時覽勝。望前耑候老夫子命駕。門人謹掃徑。鵠竚也。此稟未盡。門人在豐頓首。

絳帳南來。湖山生色。獨是門人治裝匆遽。種種疎節。未得時時隨侍。負罪悚惶。惟恃老夫子大人慈照。曲賜垂宥也。清秋爽氣。師駕臨茗。家嚴於郡城敝廬。掃徑以候。門人初八日長行矣。舟過任城。當圖趨至闕里。叩候太師母大人。師母大人萬安也。舟次留稟。不盡願言。門人名正肅。

昨歲仲冬之望。敬接老夫子手示。知絳帷暫駐維揚。卽臨虎阜。隨於膺月之朔。先耑人在蘇候信。俟師駕一到吳門。卽拉全馮門人。前驅負弩。候至望間。未得確音。至除夕信來。始知騶從過蘇。於婁東署中度歲。獻歲卽欲鼓棹叩謁。因月內每有萬不得已之應酬。須至月初。乃得出門。昨托徐彥和先爲致稟。惟期老

夫子慈照。二月上旬。門人邁赴蘇臺。趨至婁東。晉叩函丈。未審尊馭。尙駐婁東。抑至金閶。晤當事也。肅此稟候。萬福。食物不腆。奉之從者。并乞慈鑒。晒存。臨稟。悚息。門人名正肅。

命使遠臨。叩讀老夫子手示。具詢太師母大人起居萬安。老夫子孝履清和。師母世兄益獲安吉。深慰依依。去秋苦次荒迷。不能匍匐前赴。太夫子靈几。僅遣价馳奠。北望搏頰。中心負疚。如何可言。繼蒙老夫子回示。知於仲冬舉襄事。其時亦爲先慈營窆。不得趨事執紼。又無羽使。未由寄將寸衷。罪戾至今。夢寐靡寧也。先慈於正月元旦歸窆。諸事荒率。動不如禮。併不敢以具聞。真抱無涯之憾也。伏承降奠。賜以鴻章。謹對使百叩。敬薦几筵。家嚴仰藉福庇。幸健飯如常。晨昏子舍。聊奉菽水歡。回思世途塵網。不覺冷若寒灰。第君恩師誼。高厚未酬。恐亦不堪鞭策。尙望老夫子示以策海也。明歲專候絳帳南來。隨侍左右。罄寫悃誠。門人廬次無狀。杜門掃跡。久已不出戶庭。近於小祥後。至吳門謝弔。寓邸捧接台函。旅次荒涼。爰使者。附帛貳種。伏惟照存。別諭趙姓。卽諄囑當事照拂。肅泐復謝。臨稟。惶悚感切之至。制孫在豐稽首。

余進士雲祚

余雲祚謹稟。老夫子臺座。前雲祚自庚戌之秋。睽違函丈。倏爾十度星霜。遙瞻夫子。純嘏天錫。道德日崇。可勝忭慶。癸丑舍弟公車回。獲捧琅玕。如親提命。嗣後鄉園氛擾。里道悠阻。久疎音問。迨戊午初春。祚抵都門。始悉老夫子讀禮珂里。未遑躬候。抱歉殊深。茲以聽選。留滯燕邸。萬里萍浮。蕭然囊橐。尙未知所稅駕。惟冀夫子超晉崇階。爲之指南耳。邇聞仲澍張門兄。道及老夫子。指日榮補。不次之擢。拭目可俟。頃因

張子赴任入楚。順道歸里。特肅荒函。上候萬福。臨稟曷任瞻馳。雲祚再頓首稟。

顧二榮 俟考

恭謁老師座下。辛亥迄今。倏逾三載。客歲曾布手奏一緘。附致同學袁向若先生。轉達函丈。以少申謝悃。諒蒙電照。不敢再贅。嗣欲緝候。又自揣一介故吾。無以上答高厚。畏瀆清嚴。輒爲中止。然而嚮往之私。誠結於中。不能自己。敢自外乎。伏念風會維新。帖括一道。駸駸乎日趨於古。皆繇庚戌南宮師臺力任起衰。諸鉅公又從而應之。一時闡牘。煥然復古。遂爲三十年中之所僅見。是以子丑兩科。相繼迭盛。不可謂非斯文之大幸也。以愚揆之。今日者猶有文行本末之說。所當亟爲講究者爾。夫六經四子之書。所以明道也。道明於上。則教化興。道明於下。則人心正。教化興。人心正。而太和在宇宙間矣。迨道德流爲文字。其間風氣之升降。有難以悉舉者。而惟好古學道之士。必欲起而維持之何也。其所言者。皆其所行者也。不然。史漢之風神。八家之論說。苟以材智自擅者。莫不發憤爲雄。窮年矻矻。以求快夫胸臆。而究其所至。亦足以自名一家。第考諸踐履寡當焉。蓋徒務乎其末。而本之不立故也。至若廓清功利之私。滌蕩虛浮之習。一切邪說小慧。與訓詁記誦之陋。俱不足以溺之。而奮然振拔於流俗之中。惟以躬行心得者。發明聖賢之蘊。此其志非猶夫人之志。其業非猶夫人之業可知也。求之當世。不知誠有其人焉否歟。使有之。則其修辭立誠。敦本積行。所關於風教者。爲何如乎。愚知師臺興起大化。扶進人倫。未有不樂得其人。以與之朝夕者也。二榮蓋竊有志於此。而恐恐乎愧所學之不克逮焉。雖漸靡攸及。亦歷有年所。而龍江一謁。未

罄心期。乃荷師臺。一旦收而登之門墻之列。稱隆遇矣。夫豈易遵者哉。矧非有夙昔之雅。信諸生平。則其爲人之賢不肖。固未之知也。而二榮又不欲急急自鳴其志之所存。而師臺拂拭勤懇。加於等倫者。意謂其人之可以有造。以庶幾適道之一日耶。抑二榮之所遇者。猶在形迹之間。而師臺之所鑑者。已在意言之表乎。榮每於平昔反求之際。自念功利之私。何以廓清之必盡。虛浮之習。何以蕩滌之無餘。邪說之不敢遽闢。小慧之未能悉忘。訓誥記誦之結習。未易旦夕之畢化。則躬行心得者。未可以自信而自安也。是非躬承聖緒者。提命於前。無繇達矣。今者幸遇師臺。宏克復之世學。明博約之心傳。進小子而裁之。以底於明道之歸。此自昭代所希有。而先聖人以後。二千餘年。振興絕學之一日也。因不揣固陋。敬布愚衷。伏懇師臺。賜以明訓。飾以條章。二榮雖昧劣。敢不殫力奮志。冀無負於師臺之厚期也。茲有神錄近選。上呈法鑒。其中甘苦所歷。已於評語稍一露之。不審有當與否。祈公餘之暇。間賜斧削。俾小子知所從事爲禱。近聞內院熊先生。昌明斯道。振起末學。必與師臺夙有宮商之應。其語言文字。流播左右者。并祈賜觀。二以慰想慕。以襄志學。何如。臨楮可勝悚惶翹切之至。璧翁孔先生。季翁老先生。祈叱名一候。不敢另啓。并懇門人顧二榮百拜。

張贊善烈

門生迂疎之質。謬蒙聖恩。出於意外。實皆吾夫子餘庇也。史事重大。學識難周。深望夫子。時時指示之。俾勿貽譏千古。則至幸也。河間大節。乞夫子備錄。顛末見示。試卷并彭年兄卷呈覽。題難而出於倉卒。門生

僅能切題。殊乏藻麗。恐未可令人見也。詩文向無刻集。今似必不可少。謹略抄數首。敬求夫子刪正。倘有可存。乞夫子卽賜弁言爲重。如不足問世。亦候夫子直教。不復敢災梨棗矣。顛望教音。不勝翹切。伏候太師母師母世兄闔宅全福。未罄欲言。

拜別函丈。倏已年餘。太夫子窅窆之事。莫克躬親。負土罪戾已多。又不能一介專馳。代叩階下。依依南望。徒渺寤思。邇白門生相要。正擬藉鴻恭候。乃忽蒙師諭遙頒。慙慙垂問。拜讀之際。感媿交并。因詳請老師台履。太師母師母世兄闔府全祉。私慰下懷。非言辭所能盡也。門生拙滯如故。絕望通顯。今七月十八日。服闋計驗到之日。居前者不啻百餘人。萬無補理。雖禁錮盛世。不能無慨於中。然竊念古者爲己之學。缺陷良多。應無暇較計榮枯也。春間荷任楊兩先生疏薦。出之意外。揣分難當。今都催甚迫。門生尙在制內。不能恭與盛典。卽使考在制外。詩賦素非所長。今方舍田芸田。全無揣摩。萬不能得當。門生年五十七矣。非復馳逐康莊之時。念服除後。惟有編蓬環堵。彈琴而咏先王之風。此不禁人自爲之者。勿爲不肖。以遺宮墻羞。卽所以仰報造就恩者。尙望夫子指示教戒之也。恪具不腆。藉手拜獻。無足齒及。伏祝老師孝履清勝。未一。

世妹遽罹此變。慘切之極。卽欲趨庭恭慰。阻雨遲遲。罪也。暑中尙望老夫子寬解自重。是祝。捧諭祭用綾帳。稱皇清待贈孺人李家婦亡女之靈。此兩項似無可易。至主祭書名。似止宜老夫子率世兄。而祖母暨母。哀意具於文內。不必列稱於前。京俗有內眷另爲一帳。列書某氏。雜懸衆帳之內。非結紳禮也。若師伯

可列老夫子之前。而祭文仍夫子自語。固無礙也。草略無當。惟裁權請益。門生薄奠。亦在二三日內。附此稟知。烈再頓首。

正月內。四師叔惠顧敝齋。捧讀賜札。知老夫子園宅納祉。不勝欣慰。門生試事。尙未有期。春來病眩。蓋積勞所致。今少愈。尙弱。求能畢事足矣。不敢有他望也。小兒偶侍鄉闈。荷夫子骨肉至愛。喜溢於詞。雖烈私心。亦亟望焉。但恐德薄福淺。未知能仰副至意否耳。不腆一卮。遙祝岳降。輜褕之罪。實歎於心。硃卷六册。敬呈夫子教示。並呈師伯師叔世兄教。小兒受知於孫貞子父母甚切。肯麓庵有力焉。合房則陳椒峯行人也。並附以聞。臨池曷勝翹企。烈再頓首。

伏惟老夫子不以烈爲不足教。示以著書俾之參閱。烈反覆尋繹。聞所未聞。精詳慎重。異乎世之汎爲著述者。雄邁適逸。不惟遠過近代文人。而未篇攻闢異端。究極原委。卽歐公本論。有不能及。然夫子非爲文也。爲明道也。道在詩書。患在不著不察。守訓詁以沒聰明。讀斯編者。如震聳發蒙。使之瞿然而顧。庶幾新智日生。於聖道有所省入乎。其以嘉惠後學甚厚。顧其中最大節目。惟格物二字。而烈之愚闕。尙有未能遽愜於心者。誠以程朱立說。皆沉涵出入。躬行心得。數十年而後。灼見無疑者。其言平實精確。如布帛菽粟之不可易。蓋聖學攸關。非徒爭文義也。自宋元以下。學者智深勇沉。無跋及近似二夫子者。夫學力不及什一。而一旦欲易其說。是以心悸而不敢出也。先惟精。後惟一。先擇善。後固執。萬古聖學。止此定本。尙謂窮理之先。又在去私克己。似仍是誠意之事。而所謂虛能生明。鑑物不爽。又似心正以後時矣。至於上

增窮字。下增理字。陽明曾有是言。夫釋經之法。上增一字。下增一字者。多多矣。可勝譏乎。卽曰格去物累。不上增一去字。下增一累字乎。然此猶就文義論也。實就聖學體之。則聞見擇識。學問思辨。卽孔門最先從入之功。未可謂窮理之先。又有扞去物累一節也。烈之愚滯不化如此。惟夫子有以教之。其他字句訓釋異同。似無關大道。竊意前人非不見及。特擇而不用耳。而烈更有隱憂焉。明代前百五十年。天下無敢非議朱註者。其時繩矩嚴而士心樸。天下賴以治平。及陽明發難。浸淫五六十年。至萬歷之世。人人操戈以向朱子。刺剗無完膚。今迴觀其時。人心世道何如哉。天下淪胥以亡。由學術裂而人心壞也。我朝乙未戊戌以後。天下始復崇朱註。如濃霧撤而朗日開。羣遊乎蕩平正直之途也。奈學者不能深識力行。而特務和合朱陸。以資口談。或兩是之。或兩非之。正學之不能赫赫中天也。殆未知所終。當是時。發明表章之。不暇。而又從而指摘之。愚心竊怵惕焉。恐不善讀者。失夫子虛衷訂證之意。而競以菲薄前人爲事。將議論紛紛。復如向日之所爲。如之何其可歎。且萬歷以來。學者姑恕一孔子。而於孟子切切動齒唇焉。竊歎孟子救世大指。如夫子所論首章。功不在禹下者。學者胡弗表章發明。服膺而施行之。至一二疑端。不以辭害意。姑闕之可也。伏讀伐齊桃應二論。深識遠見。孟子無以應矣。而愚心又惻惻然。以爲父母語意未周。子且反覆而辯詰焉。使父默然無以應。恐子未可以稱快。而反有大不安於心也。夫子幸惠教。弟子何敢妄言。抑夫子欲明道也。虛懷再四。以能問於不能。故敢布其所疑。附事師無隱之義。望夫子詳教之。門人烈再頓首。

烈鄙妄無似。老夫子不卽棄其愚。而諄諄申誨之。諷誦再三。真如坐春風中。始覺聖道之廣大。而專己守殘者之不足。以語學也。從此從容紬繹。倘因夫子之至教。以略有所窺。凡有可請益於夫子者。仍望始終開示之。生平佩服無既矣。先此申謝。伏冀俯垂鑒悉。不宣。門人烈再頓首。

馮中書遵祖

馮遵祖謹稟。夫子大人台臺。自離左右。又兩月有奇矣。閱小抄。知夫子駕臨三衢。未知何日。台旌東返也。遵祖貧病杜門。雅志希顏。簞瓢陋巷。殆將終身。不敢學昌黎頻上執政之書。意欲師虞卿。稍作白蟬之蠶。倘天假之緣。若得集成。亦可稍報夫子知遇於萬一。但歷遭荒旱。又值軍興。亟賦之時。間讀劉炫王孝籍諸君子立大隋之朝。文章名譽。焯焯一代。猶未敢忘輸稅之苦。況於么微乎。但蝸舍悲涼。問豬肝之無日。駒鞭迅疾。歎鳳沼於何年。生當盛世。聖天子每飯不忘班馬。布衣皆賜金魚。遵祖獨爲崔亭伯之不辰。馮敬通之無命。此所以顧瞻形影。而悲從中來者也。嘗聞窮則呼天。病則呼父。夫子遵之。天與父也。能不怒焉而呼也。自庚戌及門中。思之。孫子馳驟於天衢。白子得人於閩海。張子逞步於玉堂。其他屠李諸子。分符於花縣。其間不幸溘逝者二人矣。遵祖上不能備清華顧問之選。下不得民社簿書之榮。雖尙視息。與死何殊乎。而近且數十口之米鹽。四五載之逋負。對此空銜。能不落淚。惟夫子之前。遵祖迺敢述其苦境。他人之側不言。非不能言。言之無益。非唯無益。恐亦如柳子厚之言告冠者。詫其爲與我無與也。嘉禾陸年兄諱冀英。向宦粵東。今赴京候補。景仰夫子。囑遵先容。以贊龍門。惟夫子剪拂。使其長鳴。遵祖沾榮矣。

外詩兩章附上。筆已得佳者。月初端上。遵祖稟。

馮遵祖稟。夫子大人台臺。遵祖兩附稟函。想塵尊前矣。十一月初。有薄中紀友。傳台命。促遵入都。深荷天地父母之恩。但遵訟平之後。資斧無出。不得已上會稽。又垂囊而返。今在萬分拮据。但茗中景況。夫子所悉。一二親友。皆於加納時相累。今難再啓齒。此種苦情。前二稟所未及也。茲因于勝翁先生之便。再致稟候。于公治茗十七載。善政難罄。卽如寅卯之間。躬擐甲冑。掃滅萑苻。以活窮巖。茗中萬戶。口碑如一。今來代覲。必謁夫子。伏唯多方噓植。并吾鄉大老。亦望夫子便晤時及之。遵爲千萬戶起見。非阿私也。又歸安何紫翁父母。治邑十載。瀝血飲水。湊當藩亂。催字兼勞。其才其守。夫子在茗。固所目擊。況歸安自天朝定鼎以來。從無陞遷一人。何公之賢良。公道不泯。已報最內轉。乃以好胥侵移。以因公之過。計典波累。雖公論在人。尤望夫子主持終始。俾廉吏可爲。循賢不枉。亦非一官起見也。外附拙稿兩冊。先呈台削。因未竣事。魚豕多訛。集成再奉師席。遵祖論史。自遷固至五代歐鈔。已成二千餘論。目下正論趙宋。朝廷敦重史館。若論上下百代。亦堪一助。惜蠟木朽枝。無先容者。此卞和所以抱玉而泣也。夫子其莞爾一笑否。入春拮据就道。以展立雪。臨稟激切之至。遵祖載稟。

馮遵祖敬稟。夫子大人恩臺。遵祖於前冬荷夫子使命之至。愧恨欲絕。其苦情。知使者悉之台左矣。昨冬聞駕抵吳中。卽擬走謁。至新正三日。孫門生手札云。夫子維揚度歲。頃二十日。遣兒到蘇奉迎。未得確耗。小僕走崑山徐彥翁年兄處偵詢。方知夫子行館在雲間。又云夫子不日到敝郡。之敝省三竺六橋之間。

拱候仙舟。又恐夫子久逗葺城。先遣小僕上叩左右。若夫子果至武林。遵飛棹立雪。惟夫子諭以的期。感感荒片不腆。登之別楮。十年家食。種種悲涼。雖夫子亮之。然中心如焚也。遵祖臨稟。激切遵祖拜稟。

張明府爲煥

舟行後風甚烈。深切懸念。舟子歸。知於申刻到葺。慰慰續接。老夫子手諭。知旌旆將指上洋。聞主人頗多情。且有張太夫子在彼遊道定佳。可預卜也。吳門之行。似不宜遲。但聞撫軍已公出。姑俟回署日。過往可耳。老夫子恩重如山。每承肝鬲教言。等於骨肉。私心感激。寤寐以之。日者更荷垂念北行。多方區畫。天高地厚。有非言詞所能鳴謝。萬一者。此間倘有可圖。當飛信奉聞。祇恐機緣難定耳。花期想在月杪。顯候老夫子蒞婁。當掃徑以待也。劉公札已送紫翁閱過。併繳到。謹此附稟。統惟慈鑒。不宣。

小价歸拜讀。老夫子手諭。勤勤懇懇。不啻耳提而面命之。謹鏤心版。夙夜佩服。更承曲賜軫念。於大夫子處。特囑照庇。真所謂大德難酬。罔知所報者也。爲煥於十一日北發。匆匆戒塗。弗獲恭候。老夫子旋旆。面申叩別。中心戀慕。惶人無已。李周兩先生在荒園。種種疎簡。負罪良多。或恃老夫子涵亮。不深督過耳。爲煥自蒙恩知遇以後。敬守祖家訓。兢兢修飭。砥礪廉隅。饋粥守貧。固其常分。往者竊不自揣。竭蹶捐納。囊空如洗。此番治行。百計告貸。十無一應。草草拮据。內顧傍徨。有所未暇計也。老夫子生成厚恩。如天如地。仰承明訓。永矢勿諉。將來倘得稅駕之地。自當勉策駑鈍。益自祓濯。以副老夫子屬望盛心。或亦仰報知顧之一端也。老夫子赴都。諒亦不遠。爾時尚可隨侍函丈。親承音旨。邀沐履履。正自無窮。百凡統惟存

注。禱切。禱切。吳門諸當事。果亭舍親。已曾致過。此遊亦未宜遲也。舟次附稟。不盡瞻依。

單使至。知老夫子問渡虎林。柳洲亭畔。天竺峯頭。佳景無限。盡入奚囊矣。爲煥深慚。鹿鹿弗獲。追隨杖履。然時時瞻念。輒爲神往不置也。荒園紫藤正放。敬候老夫子飛棹見過。少供清賞。竚切竚切。近者接得敝同年一札。知改授已有成說。爲煥卜於次月初二北行。本擬躬叩龍門。拜別就道。而治裝匆遽。未遂瞻依。懸懸此心。可勝戀結。倘老夫子卽返婁江。恭聆提命。固所深願。如以俗冗未暇。惟望老夫子曲賜指南。凡可爲之地者。仰祈殫心籌畫。多惠數函。俾得邀鴻覆。始終皆生成之賜矣。聞郭子齊河一缺。頗爲不佳。前蒙老夫子面商轉移之計。恐未必有濟也。如何如何。王子旋里。將及數天。知咫尺台旌。瞻仰殊切。刻下經營就任。想爾時當圖晉謁耳。肅此稟候。特遣小价泥首。伏祈迅惠德音。翹禱翹禱。臨風遙企。曷任依依。

